

मरकुसु

चेशीज सुसमाचार

मरकुसु
चेशीज सुसमाचार

Gospel According to Mark
Kinnauri

Year of Publishing : 2011

No. of copies : 75 (*Trial*)

© New Life Literature

किन्नौरी स्वादो मरकुसु चेशीज सुसमाचार दोकिच गान
छापयाशीज तिश। जू अनुवाद लानशीज किताबु दाम लानमो
ताइएस ओरछे किन-किन सलाह होज्जु पतो चेचे शेहरे।

Illustrations on pages 3, 4, 15, 23, 40, 43, 44, 45, 49, 56, 59, 63, 65, 66,
67, 67, 67 by Horace Knowles

© The British & Foreign Bible Society, 1954, 1967, 1972

Additions and amendments by Louise Bass

© The British & Foreign Bible Society, 1994. Used with permission

Illustrations on pages 68 are Used by permission.

© David C. Cook Publishing Co., 1978

Published by :

New Life Literature
C/o 295/1, Phase XI
Mohali, Punjab - 160 063

मरकुसु चेशीज सुसमाचार

जानकारी

मरकुसु चेशीज सुसमाचार होज्जु बातडहु देनज शुरु हाच्चिज्या तोह, परमेश्वरु छाड यीशु मसीऊ सुसमाचार। “जुह किताबो यीशु पड परमेश्वरु पूरोह होक रड कामड लानजया मिह चेशीज तोह। दोह होक शिक्षो देन रड भूतोतु देन, आए मिहतु पापोतु माफ लानमो बारे चेशीज तोह। जुह किताबो यीशु मसीह आनु जड, “मिह छाड” लोहच्या तोह। दोह होज्जु नुस बड्क्यो ताकि मिहतु जड पापोज मुक्ति रानमो ताइएस आनु प्राण रानज गया। मरकुसु यीशु वचन रड शिक्षो देन मानी बल्कि दोह कामडहातु देन ज़ोर शेचया तोह। होज्जु नुस दोहस दोह कथ्या पड सीधा, आसान आए ज़ोरदार डंगीस जाडचिज्या तोह। यूहन्ना बपतिस्मा रानज्या रड यीशु बपतिस्मा निम दोह परीक्षो दोकिच देस जानकारीऊ निम, किताब चेहज्या फटक यीशु चंगाड रड आए शिक्षा सेवा लानमो बारे रिडज्या तोह। हालिड-हालिड वक्त बितेदो ब्योक, होदेइ-होदेइ यीशु युमस वेनजगा, आए ओभोल सोमझेझे ब्योक्याश, पर यीशु विरोध लानजगा आए ली बोदी तेज हाच्यो ब्योक्याश। आखरी अध्याय यीशु धरतीऊ जिन्दगीऊ आखरी सप्तो घटनगातु बारे जाडचिज्या तोह, जुगोतु माजो तेग बातड होज्जु तोह, दोह जड कूसो शेनमो आए दोह हेस्स शडमो।

युहन्ना बपतिस्मा रानज्यो प्रचार

1 परमेश्वरु छाड यीशु मसीऊ सुसमाचारु शुरुवात। ²हाल्लाहि परमेश्वरु बातड रिडजया यशायाह आनु किताबो चेशीज रुह। “खिऊ गह आड दूतु जड कान ओमसी शेदो रुग। हाइसी कान ताइएस ओम्म तैयार लानतो। ³बोनिडहो इद टोकेच्यो शाद थासमो बदो रुह, ‘प्रभु ओम्म तैयार लानी, आए दोह सोलकेतु सोलडा लानी।’”

⁴होज्जु नुस युहन्ना बोनिडहो प्रचार लानो रड बपतिस्मा रानो बड्क्यो। आए मिहतु लोच तेक्यो, “पापु ओम्मू छारयाया बपतिस्मा ऊन्नही, छुलोनमा परमेश्वरीस किनजू माफ लानचिज गया। ⁵यहूदिया प्रदेशोज रड यरुशलेम निजगा चड मिह वेनवेन दोह दवा बड्क्याश आए आनेतु पापोतु लोचिस, यरदन नदीयो युहन्ना दोक्च बपतिस्मा ऊनगयाश। ⁶युहन्ना ऊंटू रोमडहातु गास्सा गाजिस निज तेक्यो आए आनु गाछकोओ चमडो गाछिड छुहछुह निज तेक्यो। आए पटकवगा रड बोनिडहु वास्स जाज्या तेक्यो। ⁷आए होज्जय लोच तेक्यो, आड युमसी हाति बनमो रुह, दोह आडहोज बोदी सोतिडस्या तोह। गह शकोम हाचिस दोह पोनातु तस्मगा तोडमो काबिल ली माएक। ⁸गता किनजू तिहस बपतिस्मा केकिक, पर दोहस्स लोनमा किनजु चोकोस आत्मास बपतिस्मा केतो।

यीशु बपतिस्मा रड परीक्षा

⁹दोइ दयारोपो यीशु गलील प्रांन्तु नासरत (देशड) गाँनिडज बहबह, यरदन नदियो युहन्ना दोक्च बपतिस्मा ऊनगयो। ¹⁰आए तेरडहि दोह तिऊ कुमोज बेरिड दोइक्यो, देरडहि दोहस्स सोरगड दोडज ताडगयो, आए पवित्र आत्मा पड कबूतर गान आनु थोग जाबच ताडगयो। ¹¹आए सोरगडज होज्जय बातड थासमो बड्क्यो, “काह


आड बेन्नडहु छाड तन, कान दोक्च गह खुश तुक।¹²दोनिम फटक पवित्र आत्मास दोह जड फटक जांगालु बिलड फयोक्यो।¹³जांगालो निश-नेजा दयार स्तड शैतानीस दोह पोरखयागयो, आए दोह जांगालो जानवरो रड निगयो आए दोह सेवा परमेश्वरु दूतोस लानो तेक्याश।

यीशु सेवा लानमो शुरुवातु बारे

¹⁴युहन्ना पड जेलो शेनमो निम, यीशु गलील बहबह परमेश्वरु राजु दामक खबर लोच तेहक्यो।¹⁵यीशुस लोडक्यो वक्त पूरोह हाचिस तोह, आए परमेश्वरु राज ओशको बहबह तोह, पापोज मोनड स्कावलि आए दामक खबरु देन विश्वास लानी।

यीशुस पह मच्छली चुमजगातु आरयामो

¹⁶गलीलु सोरडहु नड नड बयोमो बेरड, यीशुस शमौन रड दोह बाइच अन्द्रियासु जड सोरड जाली शेच ताडगयो, छुलोनमा दोहसड मच्छली चुमजगा तेक्याश।¹⁷यीशुस दोसडहूलोडक्यो, आड निमस्कोज जीरिच, गह किसीऊ जड मिहतु चुमजगा मच्छवारगा बनजयाचुक।¹⁸दोहसड फटक जालीगा शोठ्याया दोह निमस्कोज हाचिगयाश (ब्योक्याश)।¹⁹दोक ओमस्को बयोमो



किशतीऊ देन मच्छली
चुम्मो (1:16)

निम, दोहस जबदीयु छाडहा याकूब रड युहन्ना पड किशतीऊ देन जाली ओभोल लानज ताडगयो।²⁰दोहस देरडहि दोसडहूजड आरयागयो आए दोहसड आनु बाबा जबदी पड कामड लानजगा रड किस्तीऊ देन शोठ्याया, दोह निमस्कोज ब्योक्याश।



कफरनहूम नगर (1:21)

यीशुस भूत लागेच मिह पड चंगा लानमो

²¹दोनिम दोगोह कफरनहूम बड्क्याश, आए यीशु फटक यहूदीगातु आराम लानमोग दयार दोगोतु आराधनालय ब्योब्यो उपदेश रानमो देगयो। ²²आए मिहस दोह उपदेश थासथास हैरान हाचिगयाश, छुलोनमा दोहस दोगोतु शास्त्रीगातु गान मानी, पर होकदार गान उपदेश रानो तेक्यो। ²³होदेबेरोइ दोगोतु आराधनालय इद भूत लागेच मिह तेक्यो। ²⁴दोहस टोकेके लोइक्यो, हे यीशु नासरी, निड्जु कान रड् छौंग कामड? काह छौंग निड्जु खत्म लानचिमो बहबह तना? गह कानजू नेजिच्या तुक, काह हात तन? परमेश्वरु चोकोस मिह। ²⁵यीशुस दोह पड् डाँटयाया लोइक्यो, चुट्टु निऊ, आए दोगोज दोहदोह बयो। ²⁶दोनिम भूतिस दोह जड् मेक्याया आए जोरीस टोकेके दोह कुमोज बयोक्यो (दोइक्यो)। ²⁷जुह निम चइ मिह बिशारेक्याश, आए आनेतु माजिडहो बहस लानो तेक्याश, जु छौंग बातड् तोह? जु छौंग दह न्यूग उपदेश तोह, दोह होक रड् भूतोतुली आदेश रानज्या तोह। आए दोगोह यीशु आदेश मोनयाजगा तिशा। ²⁸आए दोह नामड् (फटक), होज्जयी गलीलो नेसलोह चइस परदेशोपो मशूर हाचिगयो।

यीशुस मुलूक चोचातु चंगा लानमो

²⁹यीशु फटक यहूदीगातु आराधनालयज दोहदोह याकूब आए यूहन्ना, रड् शमौन आए अन्द्रियासु किमो ब्योक्यो। ³⁰शमौनु युम्मे बुखारीस चोचो तेक्यो, आए दोगोस फटक दोह बारे दोह जड्

लोइक्याश। ³¹दोनिम दोह ओशको ब्योब्यो दोह गोद चुमचुम दोह पड सारगयो, आए दोह बुखार जाबक्यो। दोनिम दोहस दोगोतु सेवा लानमो देगयो। ³²शुपेलिड तेबेरोइ वेन रेक्यो दोनिम मिहस चइ मरीजोतु रड भूतो लागेचातु, दोह दवा करगयाश। ³³आए चइ नगरी खोलु दोड जामशीगयाश। ³⁴दोहस मुलूक मिहतु, हातेइ भान्बान्ते पीरडस चोचो दुखडस तेक्याश, चंगा लानगयो। आए मुलूक भूतोतु तोइक्यो, आए भूतोतु बातेस्मो मा शेक्यो, छुलोनमा दोगोस यीशु पड शेचगा तेक्याश।

यीशुस एकान्नड प्रार्थना लानमो बारे

³⁵सोम-सोमसी साड रातिडहि, लाए हाचिमोगोज मुलूक ओमसी, यीशु सारशीस दोइक्यो, आए जंगली जागोह ब्योक्यो। आए होदाह प्रार्थना लानमो देगयो। ³⁶दोनिम शमौन रड दोह कोनया यीशु पड पोचो ब्योक्याश। ³⁷यीशु पोरेनमो निम, दोह पड लोइक्याश, चइ मिहस कानजु जड पोचो रूश। ³⁸यीशुस दोगोतु लोइक्यो, "जइ, किशा हाम नेस-लोह आए गोनिडपो ब्योमे। छुलोनमा गह होदोरली प्रचार लानज गयाक, होज्जु नुस गह दोहदोह तुक।" ³⁹होज्जु ताइएस यीशु चइ गलीलो, दोगोतु यहूदीगातु आराधनालयगापो ब्योब्यो प्रचार लानो आए भूतोतु त्वादोह निज तेक्यो।

यीशुस कोढस्या मरिजू चंगा लानमो

⁴⁰इद कोढस्या मिह यीशु दवा बइक्यो, दोहस दोह दोक्च अर्जी लानगयो, आए दोह ओमस्को पशबाड रेबरेब दोह पड लोइक्यो, अगर कान इच्छा निमा, काह आडजु शुध्द लानचिमो थानतन। ⁴¹यीशुस दोह देन तरस ताडताड गोद बढ्ढयागयो आए दोह पड छुयाया लोइक्यो, आड इच्छा रुग, काह हुन्नइ शुध्द हाच्च।

⁴²दोनिम फटक दोह कोढ बिगयो, आए दोह शुध्द हाचिगयो।
⁴³दोनिम यीशुस, दोह पड फटक चेतावनी रानरान शेक्यो। ⁴⁴आए दोह पड लोइक्यो, "खिरू, हातुइ छची थाह लोहरा, दोहली ब्योब्यो, कान डेयडहु याजकु जड जाड, चोकोस हाचिमो ताइएस छौंगिड (आज्ञा) रिति मुसास रिड-रिड रुह, होदेइ भेंट चढयो, छुलोनमा दोगोह देन गवाइ निज गया। ⁴⁵पर दोनिम दोहस बेरिड ब्योब्यो, जुह बातडहु जड मुलूक पराक्यो, होज्जु नुस यीशु पड हेस्स चइकेतु ताडमोगो नगरो ब्योमो मुशकिल हाचिगयो। दोनिम यीशु बेरिड जांगालेपोस निज तेक्यो, आए चइ बिलडज मिह दहदह दोह दवा बच तेक्याश।

यीशु लकवो रोगी पड चंगा लानमो

2 दोक दयारेज दोह कफरनहूम बइक्यो, आए मिहस थासगयाश, दोह किमो बहबह तोह। ²दोनिम होनेस मिह जामशीगयाश, खोलु दोड जागाह मा दाक्चीगयो, आए दोहस दोगोतु बोचोन सुन्याज तेक्यो। ³आए मिहस इद अधरडगु मरिजू, पह मिहतु जड थोमो शेहशेह, दोह दवा करगयाश। ⁴दोनिम दोगोह भीइ ताइएस, दोह ओशको ब्योमो मानक्याश, दोनिम दोगोस छापरड टाइक्याश, हाति किमो यीशु तेक्यो, आए दोगोस छापरड नेस लानमो निम। दोह चारपाइ पड, हातुइ देन दोह लकवो मरिज तेक्यो, योग रानगयाश। ⁵यीशुस दोगोतु विश्वास ताडताड, दोह लकवो मरिजू जड लोइक्यो, आड छाड! कान पाप माफ हाचिगे। ⁶दोनिम मुलूक शास्त्रीगा, हातेइ होदाह तोशीस तेक्याश, आने-आनेतु मोनडहो सुनच्याशीमो देगयाश। ⁷जुह मिह होज्जय छुह लोच्या तोह, जुहदह परमेश्वरु निन्दा लानच्या तोह, परमेश्वरु अलावा हाइस

पाप माफ लानमो थानतो। ⁸यीशुस फटक आनु आत्मो नेह गयो, दोगोस आनू-आनू मोनड होज्जय सुनच्याशो रुश। आए दोगोतु लोड्क्यो, किह होज्जय छुह सुनच्याशो रुड? ⁹आसान छौंग तोह? लकवो मरिजू होज्जय लोनमोहा, कान पाप माफ हाचिग या होज्जय लोनमो, सारश कान चारपाइ थोह, आए वेन। ¹⁰दोहली गह किन दवा साबित लानताक, जुह धरतीऊ देन मिहु छाडहु जड, जुह होक रुह, दोहस पापोतु माफ लानजगया। आए यीशुस दोह लकवो मरिजू लोड्क्यो। ¹¹गह कानजु रिडहो रुग, सारश, कान चारपाइ थोहथोह, कान किमो ब्योह। ¹²दोह सारशीस आए फटक चारपाइ थोहथोह चड्केतु ओमस्कोज दोहदोह ब्योक्यो, होज्जु देनज चड बिशारेक्याश आए परमेश्वरु तारिफ लानमो देगयाश, होज्जदह निह चोंगे मा ताडगीमा।

यीशुस लेवी पड आरयामो

¹³दोह हेस्स दहदह गलीलु सोरडहु नड ब्योक्यो, चड मिगा दोह निमस्कोज ब्योक्याश, दोनिम यीशुस दोगोतु उपदेश रानगयो। ¹⁴ब्योमो बेरड यीशुस हलफयु छाड लेवी पड चुंगी उनमोग जागोह तोशीस ताडगयो, आए दोह पड लोड्क्यो, "आड निमस्कोज जोह, "दोनिम दोह सारशीस यीशु निमस्कोज हाचिगयो। ¹⁵तेबेरोड यीशु दोह किमो खाऊ ज़ामो तोशीगयो, देबेरो मुलूक चुंगी ऊनजगा रड पापिगा, यीशु रड आए दोह चेलगा रड खाऊ ज़ामो तोशीगयाश, आए होदाह होज्जयी मुलूक मिह तेक्याश, हातेड यीशु निमस्कोज हाचिस तेक्याश। ¹⁶नियमोतु सिखयाजगा हातेड फरीसीगास तेक्याश होज्जय ताडताड जुहदह पापिगा रड आए चुंगी ऊनजगा रड एकै खाऊ जोह रुह, दोह चेलगातु लोड्क्याश, दोह पापीगा रड आए

चुंगी ऊनजगा रड एकै छुह जाज्या, तुडज्या तोह। ¹⁷यीशुस होज्जय थासथास दोगोतु लोइक्यो, भला चंगा मिगातु आमजी जरुरत मानीजया नितोह, गह धर्मीगातु मानी, पापिगातु आरयामो बहबह तुक

उपवाससु बारे सवाल

¹⁸इपा युहन्ना बपतिस्मा रानज्यो चेलगा रड फरीसीगा व्रत तोह तेक्याश, दोनिम इदे मिह यीशु दवा बहबह होज्जय एक्याश, युहन्नो चेलगा रड फरीसीगातु चेलगाह व्रत छुह ताजगा तिश, आए कान चेलगा छुह व्रत मा ताजगा तिश। ¹⁹यीशुस दोगोतु लोइक्यो, लाडा तेबेर स्तडही जान्या रड नितोह, दोगोस व्रत लानताशा? आए तेरड स्तडही लाडा दोगोह रड तोह, दोहस स्तड दोगोस व्रत मा लानश। ²⁰दोहली जुह निम होनेस्के दयारो बतिश, देबेरोइ लाडा पड जान्या दोक्च याइ लानताश, दोह वक्तो दोगोस व्रत लानताश। ²¹न्यूग गास्सू टालड ऊशक गास्सो हाइसी मा शेत, छुलोनमा दोह न्यूग गास्सू टालड सिकुडेतो, दोनिम ऊशक गास्सू आए थरस्तो, दोनिम दोह ओमचोज ली बोदी जेरतो। ²²न्यूग शुध्दुडहु ऊशके मोसकीयो हाइसी माताश, छुलोनमा शुध्दुडस मोसकी पड चेरतो, आए अगूरी रड मोसकी निशमी खत्म हाचिस, दोगिता न्यूग शुध्दुडहु जड न्यूगे मोसकीयो पडताश।

यहूदीगातु आराम लानमोग दयारु बारे सवाल

²³होज्जय हाचिगयो, यीशु यहूदीगातु आराम लानमोग दयार रिमापोस हाचिस ब्योच तेक्यो, आए दोह चेलगास वेनबेरो छवातु बाल्ला चुनज तेक्याश। ²⁴दोनिम फरीसीगास दोह पड लोइक्याश, खिऊ, जुगोस आरामू दयार जुह कामड छुलानो रुश, छगिड लानमो

नियमोतु खिलाफ तोह ²⁵दोहस दोगोतु लोइक्यो, “किह छौंग होज्जय चाँगे मा हुशीगेया, तेरडहि दाऊदु जरुरत खाम्मोग, आए तेबेरोइ दाऊद रड दोह कोनया उपासड तेक्याश, दोनिम दोहस छौंग दाक। ²⁶दोहस हाल्ला अबियातार महायाजकु वक्तो, परमेश्वरु मन्दिरो ब्योब्यो, भेंट चढयाशीजा रोटे जामोग, आए दोह रोटेतु याजकोतु सिवाय आए हातुइ जामो दाम बातड मानीजया निहतोह, आए आनु कोनयातु ली रानमोग। ²⁷दोनिम यीशुस दोगोतु लोइक्यो आराम लानमोग दयार मिहतु भलाइयु ताइएस बन्याशीज तोह, पर मिह आराम लानमोग दयारु ताइएस मा बोन्याशीज तोह। ²⁸होज्जु नुस मिहऊ छाड सब्तु दयारु ली मालिक तोह।

छारज गोदस्या मिह पड चंगा लानमो

3 दोह हेस्स यहूदीगातु आराधनालय ब्योक्यो, दवा इद मिह तेक्यो, हातुइ गोद छारछार रुगयो ²दोगोह यीशु देन इल्जाम शेनमो ताइएस दोह ताको तेक्याश, खिहखिह निमेह दोहस दोह पड आरामू दयारो चंगा लानतो या मा लान। ³यीशुस छारज गोद स्या मिह पड लोइक्यो, माजिड डेन हाच। ⁴दोहस मिहतु ऐक्यो, “आराम लानमोग दयार किशो उसूल छौंग लानमो अनुमति केच्या तोह? हातु दाम लानमो ठीक तोह या हानि? हातु जिन्दगी बच्यामो दाम तोह या सानमो? दोहली दोगोह चुटू तेक्याश। ⁵दोहस दोगोतु मोनड काठस ताडताड दुखी हाचिस, दोगोतु रोषडस चइ बिलड खिहगयो, आए दोह मिह पड लोइक्यो, “कान गोद बढ्ढयो”। दोहस बढ्ढयागयो, आए दोह गोद ओभोल हाचिगयो। ⁶दोनिम फरीसीगा बेरिड ब्योब्यो फटक हेरोदिगा रड दोह खिलाफ राया लानमो देगयाश, दोह पड हाल्ला सानमे।

भीडू यीशु निमस्कोज हाचिमो

७यीशु आनु चेलगा रड गलीलु सोरडहु बिलड ब्योक्यो, दोह निमस्कोज तेग भीडू ब्योक्याश। ८आए यहूदिया, यरुशलेम, इदुमिया रड यरदनु नदिऊ नड जगाह, आए सुर रड सैदा देशडहु नेस लोज मुलूक मिह होज्जय थासथास दोह दवा बड्क्याश, किह दोहस हाल्ला बिशारेनमोगा कामड लानच्या तोह। ९दोहस आनु चेलगातु लोड्क्यो भीडू नुस इद गाट्टो किशती आड ताइएस तैयार ताहरे, छुलोनमा दोगोस आडजु मा टेमचिज गयाश १०छुलोनमा दोहस मुलूक मिहतु चंगा लानलान रुगयो, होज्जु नुस तोडंड मिह पीरडहा तेक्याश, दोह पड छुयामो ताइएस दोह देन छोकोलशो ब्योच तेक्याश। ११आए हातेतुइ भूतो लागेगे तेक्याश दोगोह मिह दोह पड ताडबेरो दोह ओमस्को बरालचगा तेक्याश, आए टोकेके लोचगा तेक्याश, काह परमेश्वरु छाड तन। १२आए यीशुस भूतोतु पक्का आदेश रानगयो हातुइ थाह लोहरे दोह हात तेहक।

सोनिश प्रेरितोतु चुनयामो

१३दोनिम दोह डोखडहु थोग ब्योक्यो, आए हातेतुइ दोहस गयाच्या तेक्यो, दोगोतु आनु दवा आरयागयो, आए दोगोह दोह दवा बड्क्याश। १४जुह दोड्ज दोहस सोनिश मर्दोतु चुनयागयो, आए दोगोतु प्रेरितो लोड्क्यो। ताकि दोगोह दोह रड निजगयाश, आए दोहस दोगोतु शेच गया, दोगोस प्रचार लानज गयाश। १५आए भूतोतु तवानमो जड हक ताज गयाश। १६दोगोह जुगो सोनिश मिह तिशा, शमौन हातुइ नामड यीशुस पतरस तागयो। १७आए जबदीऊ छाड याकूब आए याकूबु भाइच युहन्ना, हातुइ नामड दोहस बुअनरगिस, "मतलब" गुरगुरी गान ताहगयो १८आए अन्द्रियास, फिलिप्पुस,

बरतुलमै, मती रड थोमा, आए हलफयु छाड याकूब, तदै रड शमौन देश भक्त ¹⁹आए यहूदा इस्करियोती हाइसी दोहपड चुम्मो शेनमोग।

यीशु रड बालजबूल

²⁰दोनिम दोह किमो बड़क्यो आए होनेस भीडू जामशीगयाश दोगोस खाऊ ज़ामो ली मा फारयागयाश ²¹तेबेरोइ दोह पेरडहास होज्जय थासमोगा, दोनिम दोह पड चुम्मो ताइएस दोइक्याश, छुलोनमा दोगोह लोशीज तेक्याश, दोह मोनड ठिकाने मा रूह। ²²यरुशलेमज बचगा शास्त्रीगा ली होज्जय लोच तेक्याश, “दोह कुमो बालजबूल तोह” आए दोहस भूतोतु राजो मददिस भूतोतु तोच्या तोह। ²³होज्जु ताइएस यीशुस दोगोतु आनु दवा आरयाया, दोगोतु कोथ्यागापो सोमझयाज तेक्यो, शैतानीस हाल्ला शैतानु तवातो? ²⁴अगर हातु राज फूट देमा, दोनिम दोह राज हाल्ला बोन्नेने नितोह? ²⁵आए अगर हातु किमो फूट देमा, दोनिम दोह किम हाल्ला बोन्नेने नितोह? ²⁶होज्जेइ अगर शैतान आनुइ खिलाफ हाचिस आनुइ कुमो फूट शेनमा, दोह हाल्ला बोन्नेने नितोह? दोहता राज खत्म हाच्यो। ²⁷पर हातली मिहस हात बलवानु किमो घूससे दोह माल लुटयामो मान, दोहस स्तड मान, तेरड स्तड दोहस ओमस दोह बलवानु माछुत, दोनिम दोह किमु लुटयातो। ²⁸गह किनजु सच रिडहो रुग, मिहतु चइ पाप रड परमेश्वरु निन्दा, आए छगाइ दोगोस लानताश दोगोह माफ हाचिम ली थानताश। ²⁹दोहली हाइसी चोकोस आत्मो खिलाफ निन्दा लानतो, दोह पड चाँगे ली माफी मा पोरेत: छुलोनमा दोह चाँगे खत्म मा हाचिज्या पापु अपराधी नारशो। ³⁰यीशुस जुह बातड होज्जु ताइएस लोइक्यो दोगोतु माजो आधड मिह लोशो तेक्याश, “दोह कुमो भूत घूससे तोह”

यीशु आम्मा रड भाइचा

³¹दोनिम दोह आम्मा रड दोह भाइचा बडक्याश, आए बेरिड डेन हाचिस, दोह पड कुनमो शेक्याश। ³²भीड दोह नेस लोह तोशीस तेक्याश, दोगोस दोह पड लोडक्याश, "खिऊ" कान आम्मा रड कान बाइचास बेरिड कानजु पोचो रुश? ³³दोहस दोगोतु जबाव रानगयो, आड आम्मा रड आड बाइचा हाते तिश? ³⁴आए दोगोतु देन हातेइ दोह नेस लोह तोशीस तेक्याश, नजरो शेहशेह लोडक्यो, "खिह, आड आम्मा रड आड बाइचा जुगो तिश! ³⁵छुलोनमा हातेइ परमेश्वरु इच्छा देन वेनजगा तिश, दोइ आड भाइच रड रिडज आए आम्मा तोह।"

बातडहातु पारशी लोनमो

4 यीशु हेस्स सरोड नड उपदेश रानो तेक्यो, आए होनेस बोदी भीड, दोह दवा जामशीगयाश, दोनिम दोह सोरडहो इद किशतीठ देन ब्योब्यो तोशीगयो, आए चइ भीड धरतीऊ देन सोरड नड तेक्याश। ²आए दोहस दोगोतु पारशी लोहलोह मुलूक बातडहा सुनयाज तेक्यो, आए आनु उपदेशो दोगोतु लोडक्यो। ³"थासी! इद पशच्या मिह बीड पशमो दोडक्यो। ⁴पशमो बेरड दोक ओम्मू नड दाडक्याश, आए प्याचा बहबह बिडहातु रोगशीगयाश। ⁵आए दोक बिडहा पानछाल माटिडहु देन दाडक्याश, होदाह बिडहातु बोदी माटिड मा पोरेक्यो, आए डुगस माटिड मा पोरेनमो निम फटक सुगयो। ⁶आए तेबेरोइ वेन जरगयो, देबेरो दोह नालगयो, आए जिलड माटिड बोदी योग मा निमो नुस छारगयो। ⁷दोक झाटडपो दाडक्यो, आए झाटडहा बोलबोल दोह छवापड टेमगयाश, आए दोगोह सीलड मा देगयो। ⁸पर दोनिम दोक बिडहा दाम माटिडहु

देन दाइक्याश, आए दोगोह सुगयाश, आए बोलबोल सीलडहा देगयाश, आए इदेस नेजो साये गुना, आए इदेस शुम नेजा गुना, आए इदेस राह गुना फोसोल करगयाश। ⁹दोनिम दोहस लोइक्यो, “हातुदाइ थासमो ताइएस कानडहा रुइ, दोगोस थासी।

पारशीगा लोनमोगु मतलब

¹⁰तेबेरोइ दोह ऐच्छि तेक्यो, देबेरो दोह बातड रेनचिजगा रड दोह सोनिश चेलगास दोह दोक्च जुगो पारशीगातु बारेओ ऐक्याश। ¹¹दोहस दोगोतु लोइक्यो किनजु परमेश्वरु राजु भेद पोरेरे रुइ, पर बेरिड जगातु ताइएस चइ बातड पारशीगापो तिश।

¹²“होज्जु ताइएस दोगोस खिह बेरो ताडजगयाश, आए दोगोतु पता मा चालेच गया, आए थास बेरो थासच ली गयाश आए मा सोमझेच गयाश, होज्जय मा हाचिज गया, दोगोस परमेश्वरु बिलड मोनड स्कवालज गयाश आए माफी पोरेच गया।”

यीशुस बीड पशमोग पारशी पड सोमझायामो

¹³दोनिम यीशुस दोगोतु लोइक्यो किह छौंग जुह पारशीगातु मा छागेया, दोहच हाल्ला चइ पारशीगातु छातइ? ¹⁴पशच्या मिहस परमेश्वरु बोचोन पशतो। ¹⁵हातेइ ओम्मू नड जगाह तिश, हामि बोचन पशते, जुगो दोगोह मिह तिश हातेसी बोचन थासमोगा, दोनिम शैतान फटक बहबह बोचोनु हामिडहि पशपश रुगीमे, थोहथोह फयोमोग। ¹⁶होदेइ छौंगिड पानछाल माटिड पशते, जुगो दोगोह तिश, हातेइ बोचोनु थासथास फटक खुशीस मोनयाताश। ¹⁷पर आनु कुमो जिलड मा निमो ताइएस, दोगोह दोक दयारुइ नितिश, जुनिम तेबेरोइ बोचोनु ताइएस दोगोतु बिलड दुखड रड विरोध हाच्यो। देबेरो दोगोह फटक ठोकर जातिश। ¹⁸हातेइ झाटडहा

पो पशकिमे, दोगोह जुगो तिश, हातेसी बोचोनु थासमोगा। ¹⁹आए जिन्दगीरु फिकोर रड धनु धोखा, आए हाइदे चीजोतु लालच दोगोतु कुमो बहबह बोचोनु टेमताश, आए दोहस फसोल माकर। ²⁰आए हातेइ ओभोल माटिड पशकिमे, जुगो दोगोह तिश, हातेसी बोचोनु थासथास मोनयाताश आए फोसोल करताश, इदेस नेजो साये, इदेस शुम नेजा, इदेस राह गुणा।

यीशुस दिवो कोथ्या लोहलोह पारशी सोमझयामो


²¹यीशुस दोगोतु लोइक्यो दिवा पड होज्जु ताइएस करतेहा, दोह पड जड हातली बानिडहु या पलंग योग तामोजड? छौंग चाढड तामो ताइएस मानिहा? ²²छची चीज माडशीस माय, छौंगिड ताडमो माबत आए नाता छची बातड गुप्त तोह, पर होज्जु ताइएस तोह दोह चइस नेचगयाश ²³अगर हातुइ थासमो जड कानड रुइताह दोगोस थासी। ²⁴दोनिम दोहस दोगोतु लोइक्यो, चौकस निह, किह छौंग थासो रुइ, छगिड बर्ताव किह लानो रुइ, होदेइ बर्ताव किन रड ली परमेश्वरस लानतो, आए किन रड बोदी लानतो। ²⁵आए हातुदाइ रुह, दोह पड आइ पोरेतो, आए हातुदाइ मा रुह, दोह दोक्च, दोह ली छगिड दोह दवा रुह उनताश।

सुजया बीयडहु कोथ्या

²⁶दोनिम दोहस लोइक्यो, “परमेश्वरु राज होनेस तोह, हाल्लाइ इद मिहस रिमो बीड पशतो, ²⁷आए शुप्पा याक्शो, आए लाये सारशो, आए दोह बीड होन्ने सुमा आए बोढेनमा, दोह पड पता मा चालेनमा। ²⁸धरतीस आनीस छवा पड सुमो शेतो, ओमस परोलेतो, दोनिम सीलड आए सीलड तैयार बीड। ²⁹आए तेबेरोइ बीड फटक पाकेतो, देबेरोइ दोहस फटक जितरड शेतो, छुलोनमा लाम्मोग वक्त बहबह तोह।

राइउ बीयडहु पारशीयो लोनमो

³⁰दोनिम यीशुस लोइक्यो, “किशा परमेश्वरु राजु बराबरी हात रड लानमे, आए हात पारशी रड दोह बयान लानते? ³¹दोह राइउ बीड गान तोह, तेबेरोइ माटिड पशते, देबेरो धरतीऊ चइ बिडहा पोज गोट्टोह नितोह। ³²दोहली पशमो निम, दोह सुहसुह चइ बालडहापोज तेग हाच्यो, आए दोगोह होनेस तेगे बाराह दोतिश, दोनिम सोरगडहो प्या दोह छादरड वाह बन्न्यामो थानताश। ³³दोहस दोगोतु होजेस्के




राइउ बालड (4:31)

मुलूक किस्मु पारशीगा लोहलोह, तोइड दोगोस सोमझेतिश होदोइ परमेश्वरु बोचन पारशीगापो लोच तेक्यो। ³⁴बगैर पारशीगातु दोहस दोगोतु छ्ची मा सोमझयाज तेक्यो, पर एकान्णड दोहस आन्नु खास चेलगातु चइ बातडहातु मतलब सोमझयाज तेक्यो।

यीशुस लिहलानु थोम्यामो

³⁵दोइ दयार, शुपेलिड हाचिमो निम, यीशुस चेलगातु लोइक्यो, “पइ, किशा सोरडहु नड ब्योमे।” ³⁶आए दोगोस भीडू जड शोठ्ठयागयाश, चेलगा दोह किशतीयो ब्योक्याश हाति किशतीयो यीशु तेहक्यो आए होदेइ दोह पड फ्योक्याश, होदाह आए ली किशतीगा तेक्याश। ³⁷फटक मुलूक लिहलान बइक्यो, आए तिऊ लहरो किशतीउ देन होन्ने बच तेक्याश, दोह



सोमोदरड लिलान् दोर
किशति (4:35)

तिहस बडज तेक्याश। ³⁸दोहली यीशु किशतीठ निमस्को बिलड यागशीस तेक्यो, दोनिम चेलगास दोह पड सारसार लोडक्याश, गुरु जी, कानजु फिकोर मा हाचचो रुहा, किशा शीमो रुहमे? ³⁹दोनिम दोहस सारशीस लिहलानु हुकुम रानगयो, आए तिह पड लोडक्यो, “चुट्ट निरु, डेम” आए लिहलान डेमक्यो आए मुलूक शान्ति हाचिगयो। ⁴⁰आए चेलगातु लोडक्यो, “किह छुह ब्याडचगा तड? किनजु छोग हुनस तड विशवास मा रुडया?” ⁴¹दोगोह मुलूक ब्याडक्याश आए आनेतु कुमो लोशीगयाश, “जु हात तोह, लिहलान रड तिहस ली दोह हुकुम रेनचो रुश?

भूत लागेच मिह पड ठीक लानमो

दोगोह सोरड नड गिरासेनिगातु देशड पडक्याश, ²तेबेरोड दोह **5** किशतीठ देनज जाबक्यो, दोनिम फटक इद मिह हातुड कुमो अशुद्ध आत्मा तेक्यो, ऐलिडहापोज^a दहदह दोह पड छुगशीगयो। ³दोह ऐलिडहापो निज तेक्यो, आए शाडलिडस छुनमो जड दोह पड हाइसी मानज तेक्याश। ⁴छुलोनमा दोह पड बार-बार बेडिगा रड शाडलिडस छुहछुह रुगयाश, पर दोहस शाडलिडतु चगचग आए बेडिगातु टुकरा-टुकरा लानलान रुगयो, आए हाइसी दोह पड काबू लानमो मानज तेक्यो। ⁵दोह रोज रातिड-लाये ऐलिडहापोस रड डोखडहा देनस टोकेदो आए आनु रागास घायल लानजया तेक्यो। ⁶दोहस यीशु पड वारक्योज ताडताड ठुरेक्यो, आए यीशु ओमस्को पशबाडहा रेबरेब, ⁷आए जोरीस आवाजिस टोकेके लोडक्यो, “यीशु! महाप्रधान परमेश्वरु छाड! आडजु कान दोक्च छोग कामड? गह कानजु परमेश्वरु कसम क्यो रुग, काह आडजु सजा थाहके।” ⁸(छुलोनमा यीशुस दोह पड लोहलोह रुगयो, “हे

^a 5:2 कन्नरिस्तान

लाकिया आत्मा, जुह मिह कुमोज बेरिड दोहता!) ९यीशुस दोह पड ऐक्यो, “कान नामड छौग रुन?” दोहस दोह पड लोइक्यो, “आड नामड सेना रुग, छुलोनमा निह मुलूक तनमा।” १०आए दोहस यीशु दोक्च मुलूक विनती लानगयो, “निडजु जुह देशडज बेरिड थाह शेच।” ११होदाइ डोखड देन इद सुवरोतु शालड रोगशो तेक्याश। १२भूतोतु सेनास यीशु दोक्च विनती लानन लोइक्याश, “निडजु नुगो सुवरो पोह शेच, निह दोगोतु कुमो ब्योच गयामा।” १३दोनिम दोहस दोगोतु हुकुम रानगयो आए लाकिया आत्मगा दहदह सुवरोतु कुमो ब्योक्याश आए हाती शालड लोनमा तकरिबन निश हजार स्तड तेक्याश, दोह शालड डोखड देनज लाडगोटे शेदो सोरड ब्योक्याश आए डुबेबे शिगयाश। १४दोगोतु पालास ठुरेरे नगरी रड गाँनिडहापो खबर सुन्यागयाश, आए छौगिड हाचिस तेक्यो, दोह खिमो मुलूक मिह बइक्याश। १५यीशु दवा बनमो निम, दोगोस दोह पड हातुइ भूतो लागेगे तेक्याश, मतलब हातुइ सेना लागेगे तेक्यो, गास्सा गाजिस रड चुटू तोशीस ताडताड ब्याडक्याश। १६हातेसी होज्जय ताडगयाश, भूत लागेच मिह आए सुवरो रड छौगिड बितेते तेक्यो, होदोह बारेओ दोगोतु लोइक्याश। १७दोनिम दोगोस यीशु पड विनती लानलान लोनमो देगयाश, निड जागोज बेरिड ब्योह। १८यीशु किशतीड देन ब्योमो बेरड, हातुइ मिह पड भूतो लागेगे तेक्यो, यीशु दोक्च विनती लानमो देगयो, “आडजु कान रड निमो शेच।” १९पर यीशुस दोह पड हुकुम मा रानगयो, आए दोह जड लोइक्यो, “कान किमो ब्योह-ब्योह कान मिहतु लोत कान देन दया लानलान प्रभुस कान ताइएस हाल्ला तेग कामड लानमोग।” २०होज्जु नुस दोह ब्योह ब्योह दिकापुलिसो^b जुह बातड प्रचार लानज तेक्यो, यीशुस आड ताइएस हालिस तेग कामड लानमोग, आए चइ मिह हैरान हाचिज तेक्याश।

^b 5:20 दिका=दस, पुलिस=नगर

याइरु शिज चिम्मि रड इद चोच छेचमि

²¹तेबेरोइ यीशु हेस्स किशतीउ देन नड ब्योक्यो, देबेरो इद तेग भीइ दोह दवा जामशीगयाश। दोह सोरडहु नडहि तेक्यो, ²²देबेरोइ आराधनालय मुखियागातु माजो याइर लोनमोग इद मिह बइक्यो, आए दोह पड ताडताड दोह बाडहापो पोरेक्यो ²³आए होज्जय लोहलोह दोह दोक्च मुलूक विनती लानगयो, “आड गाटो चिम्मि शिमो दोडस्तड बहबह तोह, काह बहबह दोह देन गोद तोह, छुलोनमा दोह चंगा हाचिस शड निजगया। ²⁴दोनिम यीशु दोह रड ब्योच तेक्यो, आए तेग भीइ दोह निमस्कोज हाचिगयाश, यीशु देन बरालोइ होनेस भीइ तेक्याश।

²⁵इद छेचमि होदाह तेक्यो, हातुइ खुन बोएनमोग पीरड लागेगे, सोनिश बोरशड हाचिस तेक्यो। ²⁶दोहस मुलूक आमजीगा दोक्च इलाज लानो-लानो मुलूक दुखी हाचिस तेक्यो, दोह दवा तोइड माला रुगयो, चइ खर्चयामो निम, दोमरी ली दोह छची फोरोक मा बहबह रुगयो, पर दोनिम आए ली दोह पीरड बोदढे रुगयो। ²⁷दोहस यीशु चर्चा थासथास भीइ माजिडहोज, दोह निमस्को बइक्यो आए दोह कापरा छुयागयो। ²⁸छुलोनमा दोह छेचमिहस सुनचयाशो रुगयो, अगर गह दोमरी ली नूह गास्सातु, छुय्यामो थानमा, गह चंगा हाचुक। ²⁹आए फटक दोह खुन बोएनमो पीरड बंद हाचिगयो, आए दोहस आनु डेयड नेगयो गह दोह पीरडस चंगा हाचिस तुक। ³⁰यीशुस फटक आनु कुमो नेगयो, आड कुमोज सोतिड दोइक, आए भीडो निमस्को पोलटेटे ऐक्यो “आड कापरा हाइस छुय्यामोग?” ³¹दोनिम दोह चेलगास दोह पड लोइक्याश, काह

° 5:25 मुस्सो नियमु अनुसार मासिक धर्म पेजड अशुध्द मोनयाजगा तेहक्याश।

ताडहो रुन भीड़ कान देन बरालो रुश, आए काह ऐहचो रुन, आडजु हाइस छुय्याजिग" ³²दोनिम यीशुस दोह मिह पड खिमो ताइएस हाइस दोह गास्सु छुय्यामोग, चइ बिलड खिगयो। ³³दोनिम दोह छेचमिह होज्जय नेहनेह, गह हाल्ला पीरड ठीक हाचिगिक, भयाड भयाड कांपेदो, दोह ओमस्को बइक्यो आए दोह बाडहापो बराल बराल चइ सोच-सोच लोइक्यो। ³⁴यीशुस दोह पड लोइक्यो, "आड चिम्मे" कान विशवासीस कानजु चंगा लानचिग, खुशीस बयो, आए काह जु पीरडस बोच्चे निऊ।

³⁵यीशुस होज्जय लोदोइ तेक्यो देबेरो आराधनालय मुखियो किमोज मिहस बहबह लोइक्याश, कान चिम्मे ताह शिग, ऐब्बे गुरु पड छुह कोष्ट रानो रुन? ³⁶छौंगिड बातडहा दोगोस लोदो तेक्याश, दोगोह बातडहातु यीशुस मा थाच हाचिस, आराधनालय मुखिया पड लोइक्यो, "थाह ब्याड, सिर्फ विशवास लान।" ³⁷दोनिम यीशुस पतरस, याकूब, याकूबु भाइच युहन्नो सिवाय हातुइ आनु रड बनमो हुकुम मा रानगयो। ³⁸आराधनालय मुखियो किमो पनमो निम। यीशुस मिहतु जड मुलूक जोर-जोरीस टोकेदो क्राबच ताडगयो। ³⁹दोनिम यीशु कुमो ब्योब्यो, दोगोतु लोइक्यो, "किह छुह हल्ला मच्चयो रुइ? आए छुह क्राबो रुइ? चिम्मे शिशी थोरीतोह, दोह यागशो रुह। ⁴⁰जु बातडहु देनज दोगोस यीशु ठाट्टे लानगयाश, दोनिम यीशुस चइ मिहतु बेरिड शेक्यो आए चिम्मेयो अम्मा, बोऊ, हातेइ चेलगा यीशु रड तेक्याश, सिर्फ दोगोतु आनु रड तागयो। ⁴¹आए चिम्मेयो गोद चुमचुम, दोह पड लोइक्यो, "तलीता कूमी।" जु मतलब तोह- "हे चिम्मे, गह कानजु रिडहो रुग, सारश!" ⁴²दोनिम चिम्मे फटक सारशीस नेस लोह हालेनमो देगयो, (दोह सोनिश बोरशडहु तेक्यो) होज्जय ताडताड मिह भान्ति बिशारेक्याश। ⁴³दोनिम यीशुस दोगोतु सख्त चेतावनी रानरान

आदेश रानगयो किह जु बातड हाइसी मानेज गयाश, आए लोइक्यो, “जु जड छौंगताह ज़ामो रानी।”

गोन्यास यीशु मसीह पड मा मोनयामो

होदोरज दहदह यीशु आनु गोनिड नासरतो बइक्यो, दोह चेलगा **6** ली दोह निमस्कोज ब्योक्याश। ²आराम लानमोग दयारो दोह आराधनालयो उपदेश रानमो देगयो, दोनिम मुलूक मिहस थासथास हैरान हाचिस लोशीज तेक्याश, जुस जु बातड हामच नेमोग? जु हामचु ज्ञान तोह, छौंगिड दोह पड रानरान रुश? हाल्ला सोतिडहु कामड नूह गोदोज हाचिज ताड बचगा तिश? ³जुह होदोइ मिस्त्री मानिहा? हाती मरियमु छाड, आए याकूब, योसेस, यहूदा रड शमौनु आते तोह? दोह रिडजा होज्जोर मा निजगा तिशा?” होज्जु नुस दोगोस दोह जड मा मोनयागयाश। ⁴यीशुस दोगोतु लोइक्यो, “भविष्यवक्तो आनु देशड आए आनु पेरडहापो आए आनु किमु बसक्याड आए हामि अपमान मा हाचिज्या नितोह। ⁵यीशुस होदोर छची सोतिडहु कामडहा मा लानगयो, सिर्फ दोकिय चोचातु देन गोद ताहताह दोगोतु चंगा लानगयो। ⁶आए यीशु दोगोतु विश्वास मा लानमोगु देनज बिशारेक्यो, आए दोह चइ बिलड गोनिडपो उपदेश रानो ब्योच तेक्यो।

यीशुस सोनिश चेलगातु शेनमो

⁷यीशुस चइ सोनिश चेलगातु आनु दवा आरयागयो, आए दोगोतु निश-निश कोनया जुरयाया शेक्यो आए दोगोतु अशुध्द आत्मगा देन (अधिकार) होक रानगयो। ⁸यीशुस चेलगातु आज्ञा रानगयो, “ओमोस वेनमो ताइएस मुडेगा सिवाये, छची थाह फयोइ, नाता रोटे, ना झोल्ली, ना बटुओ रुपया। ⁹पर पोना गाजी, आए निश

कमीचा थाह फ्योड। ¹⁰आए यीशुस दोगोतु होज्जय ली लोइक्यो हामली किह हातुली किमो ब्योतई, तेरडस्तड दोह किमोज मा ब्योड, दोहस्तड होदोड किमो रुकेके निहरे। ¹¹हामि जागोह किन विशवास मा लानश, आए किन बातड मा रेनचिस, दोनिम दोगोतु शोठ्ठयाड, दोगोतु खिलाफ गवाड निमो ताइएस किन बाडहापोज दोरजु माट्टिड ठालरे^d। ¹²दोनिम दोगोस ब्योब्यो प्रचार लान गयाश “पाप लानमो छारयाया परमेश्वरु बिलड पोलटेड” ¹³आए मुलूक भूत-प्रेतोतु तोइक्याश, आए मुलूक पीरडसगा मिहतु तेलड शेलशेल, दोगोतु चंगा लान गयाश।

युहन्ना बपतिस्मा रानज्या पड सानमो

¹⁴हेरोदेस^e राजास ली यीशु चर्चा थासक्यो, छुलोनमा दोह नामड मुशूर हाचिस तेक्यो, आए इदे मिहस लोशीज तेक्याश, “युहन्ना बपतिस्मा रानज्या शिजातु माजिडज शड हाचिस तोह, दोगिता दोह दोकच जुह सोतिडहु कामडहा हाचिज ताड बदो रुश।” ¹⁵हाइदे मिहस लोइक्याश, “जुह एलिय्याह^f तोह।” पर आइ हाइदेस लोइक्याश, “भविष्यवक्ता या ओमचू भविष्यवक्तगातु माजिडज इदु गान तोह।” ¹⁶हेरोदेसीस होज्जय थासथास लोइक्यो, “हाती युहन्नो बपतिस्मा रानज्या पड गह बाल शुम्म शेकिक, दोह हेस्स शडग हाचिस तोह।” ¹⁷हेरोदेसीस आनु भाइच फिलिप्पुसु दोरजे हेरोदिया ताइएस, युहन्ना पड चुम्मो सैनिकोतु शेहशेह, जेल शेक्यो। छुलोनमा दोस्स हेरोदिया

^d 6:11 चेलगास होदोरजगा मिहतु इंकार लानमो ताइएस

^e 6:14 हेरोदेस अंतिपास हाति गलीलु राजा तेहक्यो, दोह बाबा महान हेरोदेस छाड तेहक्यो।

^f 6:15 जु भविष्यवक्ता यीशु मसीह जोरमेनमोगोज मुलुक ओमी धरति देन जोरमे तेहक्यो।

रड शादी लानलान रुगयो। ¹⁸आए युहन्नास हेरोदेसु लोच रुगयो, “कानजु कान भाइचु दोरजे पड ताहमो दाम बातड मानी।” ¹⁹होज्जु नुस हेरोदिया युहन्ना रड दुशमनी ताहजे तेक्यो, आए युहन्ना पड सानमो गयाया तेक्यो, पर दोहस्स हेरोदेसु वजेस सानमो मानमान तेक्यो। ²⁰छुलोनमा हेरोदेस युहन्ना पड धर्मी रड चोकोस मिहतो नेहनेह, दोह दोक्च भयाडच्या तेक्यो, आए दोह रक्षा लानचया तेक्यो, आए दोह बातडहा थासथास मुलूक ब्याडच्या तेक्यो, दोहली खुशीस रेनचिज्या तेक्यो। ²¹हेरोदियो ताइएस ठीक मौका देबेरो बडक्यो, तेबेरोइ हेरोदेसीस आनु जोरमडहु दयार आनु प्रधानोतु रड सेनापतिगातु, आए गलीलु मुखियगातु भोजिडहु ज़ामो जड आरयागयो। ²²दोनिम हेरोदियो चिम्मे कुम्म बडक्यो, आए चाहचाह हेरोदेस रड दोह मेहमानोतु खुश लानगयो। होज्जु नुस राजास दोह चिम्मे पड लोइक्यो, “काह छगिड गयातन आड दोक्च उनच, गह कानजु केतुक। ²³आए दोहस दोह जड कसम जाजा लोइक्यो, “आड आधड राज्य ली, छगिड काह उनचन, गह कानजु केतुक। ²⁴दोहस बेरिड ब्योब्यो आनु आम्मा पड ऐक्यो, “गह छौग ऊनग?” दोहस लोइक्यो युहन्ना बपतिस्मा रानज्यो बाल्ल।” ²⁵दोह फटक राजो दवा कुम्मो बडक्यो आए राजा पड लोइक्यो, “गह गयाया तुक हुन्नइ युहन्ना बपतिस्मा रानज्यो बाल्ल इद नाड ताहताह आडजु केत। ²⁶दोनिम राजा मुलूक उदास हाचिगयो, पर आनु कसम ज़ामो ताइएस आए ऐके तोशीजगा मेहमानोतु ताइएस दोह पड इंकार लानमो दाम मा चालगयो। ²⁷दोनिम राजास फटक इद सिपाही पड हुकुम रानरान शेक्यो ताकि दोह बाल्ल करज गया ²⁸दोह जेलो

⁸ 6:18 तेरड स्तड दोह भाइच माशीत, दोगोज ओमस दोह दोरजे रड शादि लानमा पाप मोनयाजगा तेक्याश।

ब्योब्यो दोह बाल्ल शुबक्यो आए इद नाड ताहताह करगयो, आए दोह चिम्मो पड रानगयो, आए दोहस आनु आम्मा पड रानगयो।²⁹ होज्जे थासमो निम युहन्नो चेलगा बड्क्याश, आए दोह लाशु जड फयोक्याश आए आगो तागयाश।

चेलगातु वापस बनमो रड एकान्नड ब्योमो

³⁰चेलगा यीशु दवा वापस बड्क्याश, छौंगिड दोगोस लानलान रुगयाश आए सिखयाया रुगयाश, चड यीशु पड लोड्क्याश। ³¹यीशुस चेलगातु लोड्क्यो, “पड किशा चड हामता एकान्नड जागोह ब्योमे



मच्छली रड रोटे (6:31)

होदोर किह आराम लानरे।” छुलोनमा मुलूक मिह बदो-ब्यो निज तेक्याश आए दोगोतु खाऊ ज़ामो ली वक्त मा पोरेच तेक्यो। ³²होज्जु बातडहु देनज दोगोह किशतीठ देन देहदेह एकान्नड जागोह याइ हाचिस ब्योक्याश।

डहा हज़ार मिहतु खाऊ रानमो

³³मुलूक मिहस दोगोतु ब्योच ताडताड शेषक्याश, आए चड नगरो पोज जामशीस, होदोस स्तड ठुरयाशीस दोगोपोज ओमस पड्क्याश। ³⁴दोहस जाम्मो निम मुलूक भीडू ताडगयो आए दोगोतु देन तरस देगयो, छुलोनमा दोगोह दोह जेहतु गान तेक्याश, हातुइ हाति पालस मान्नी, आए यीशुस दोगोतु मुलूक बातड सिखयाज तेक्यो। ³⁵शुपेलिड हाचिमो निम, दोह चेलगा दोह दवा बहबह लोच तेक्याश, “जुह सुनसान जागाह तोह, आए लाए मुलूक डोलेले तोह। ³⁶आए मिहतु विदा लान, छुलोनमा चड बिलड गोनिडहा रड बस्तिगापो ब्योब्यो, आनेतु ताइएस छौंग ताह ज़ामो जोक्च गयाश।” ³⁷दोहस

जबाब रानगयो, “किहि नुगोतु ज़ामो रानी।” दोगोस यीशु पड लोइक्याश, “निह छौग निश राह चाँदीठ सिक्कगातु^h खाऊ ज़ोगज़ोग दोगोतु रानमाहा?” ³⁸यीशुस दोगोतु लोइक्यो “ब्योब्यो खिह किन दवा तोह रोटे रूइ?” दोगोस पता लानलान लोइक्याश, “इहा रोटे रड निश मच्छलीगा।” ³⁹दोनिम यीशुस दोगोतु हुकुम रानगयो चइकेतु राग चिऊ देन टोल बन्नयाया स्तोइ।” ⁴⁰दोगोह राह-राह रड आए निश नेजो सायु टोल बन्नयाया तोशीगयाश। ⁴¹यीशुस दोह इहा रोटेतु रड निश मच्छलीगातु ऊनगयो आए स्वर्गू बिलड खिहखिह परमेश्वरु धन्यावाद लानगयो, आए रोटेतु खानयो-खानयो चेलगातु रानो तेक्यो छुलोनमा दोगोस मिहतु काकच गयाश, आए दोह निश मच्छलीगातु ली दोगोह चइकेतु काक्यो। ⁴²चइस जाहजाह गरिक्याश, ⁴³आए चेलगास टुकरगास पडपड सोनिश छाटोगा रड दोक मच्छलीगास बडशीजा ली थोगयाश। ⁴⁴हातेसी रोटे जागयाश, दोगोह इहा हज़ार स्तड छौड मिह तेक्याश।

यीशु तिऊ देन वेनमो

⁴⁵दोनिम यीशुस फटक आनु चेलगातु किशतीठ देन ब्योमो मजबूर लानगयो छुलोनमा आनीस मिहतु विदा लानस स्तड, दोगोह आनोज ओमस नडपाशो बैतसैदा पचगयाश। ⁴⁶दोगोतु विदा लानलान दोह डोखडहु देन प्रार्थना लानमो ब्योक्यो। ⁴⁷दोनिम शुपेलिड हाचिमो निम किशती सोरडहु माजिडहो तेक्यो, आए दोह ऐच्छि धरतीऊ देन तेक्यो। ⁴⁸तेबेरोइ यीशुस ताडगयो लान दोगोतु खिलाफ तोह, आए दोगोह किशती चालयो-चालयो यालयाल तिश, दोनिम यीशु साड रातिड हाचिमो बेरड सोरडहु देन वेनो दोगोह दवा बइक्यो,

^h 6:37 इद चाँदीठ सिक्का इद मिउ इदयारु दयाढि।

आए दोगोपोज ओमस दोनमो गयाच्या तेक्यो। ⁴⁹पर दोगोस दोह पड सोरडहु देन वेनज ताडताड चालगयाश दोह प्रेत तोह, आए टोक्याशीगयाश। ⁵⁰छुलोनमा चड दोह पड ताडताड भयाड-भयाड तेक्याश। दोनिम यीशुस फटक दोगोतु बातयागयो आए लोडक्यो “हिम्मत ताडः गह तुक, थाह भयाडहि!” ⁵¹दोनिम यीशु दोगोह दवा किशतीउ देन बडक्यो, आए लान डेमक्योः आए दोगोह मुलूक बिशारेक्याश। ⁵²दोगोतु दोह रोटे तोनमोगु सोतिड बारेओ पता मा चालेले तेक्यो, छुलोनमा दोगोतु समझ बंद हाचिस तेक्याश।

यीशुस गन्नेसरतो चोचातु चंगा लानमो

⁵³दोगोह नड जाबजाब गन्नेसरत पडक्याश, आए किशती किनारे शेक्याश। ⁵⁴तेबेरोड दोगोह किशतीउ देनज जाबक्याश, दोनिम दोह मिहस फटक शेषशेष, ⁵⁵नेस लोह चड गोनिडपोज ठुरेक्याश, आए बीमारोतु चारपाड देन शेषशेष, हामि-हामि समाचार थासक्याश दोह तोह, होदोर-होदोर लिगशीस ब्योक्याश। ⁵⁶आए हाम ली दोह गोनिडपो, नगरपो रड बस्तिगापो ब्योच्या तेक्यो, मिहस मरिजोतु बाजारो ताहताह दोह दोकच विनती लानजगा तेक्याश दोहस दोगोतु आनु गासातु हिस्सा पडहि छुयामो शेचः आए तोडड मिहस दोह पड छुयाजगा तेक्याश, चड चंगा हाचिजगा तेक्याश।

रिति-रिवाजु बारे सवाल

दोनिम फरीसीगा रड हातेड शास्त्रीगा यरुशलेमज बहबह **7** तेक्याश, यीशु दवा जामशीगयाश। ²आए दोगोस यीशु आधड चेलगातु रिति-रिवाज मुताबिक गोद मा जिशीस खाऊ जाज ताडगयाश। छुलोनमा दोगोस अशुध्द मोनयाजगा तेक्याश। ³(छुलोनमा फरीसीगा रड चड यहूदिगा, पुर्वजोतु बोण्याशीजा रिति

मुताबिक वेनज़गा तेक्याश, आए तेरड स्तड ओभोल ढंगीस गोद मा जिशीजगा तेक्याश, दोहस्तड खारू मा जाजगा तेक्याश, ⁴आए दोगोस करशीजा चीजोतु माचिस स्तड माझाज तेक्याश, आए ली होजेस्के मुलूक रिति-रिवाजो रूगयाश, जुह रिति-रिवाजोतु दोगोस पालन लानज तेक्याश, रिवाजो लोनमः कटोरगा, आए लोशटिगा, आए त्रोम्डहु बानिडहातु माज्जयाया चिमो।) ⁵होज्जु नुस दोगोह फरीसीगा रड शास्त्रीगास यीशु पड ऐक्याश कान चेलगास बुजुरगोतु रिति-रिवाजोतु छुह मा मोनयाजगा तिश, आए रिति-रिवाजु मुताबिक छुह गोद मा जिशीस खारू जाजगा तिश? ⁶दोहस दोगोतु लोइक्यो यशायाह भविष्यवक्तास किन कपटिगातु बारेओ एकदम ठीक भविष्यवाणी लानलान रुह; हालिड चेशीज तोह:

‘जुह मिहस खाकड ताह आड तारिफ लानजगा तिश, पर नुगोतु मोनड आडहोज वारक्यो निजया तोह। ⁷जुगो फोड आड उपासना लानजगा तिश, छुलोनमा जुगो मिहतु नियमोतु आड नियमो तिश लोहलोह सिखयाजगा तिश।’

⁸“किह परमेश्वरु नियमो मा रेनचिस मिहतु नियमोतु मोनयाजगा तइ।” ⁹यीशुस दोगोतु आए ली लोइक्यो, “रिति-रिवाजोतु मोनयामो ताइएस परमेश्वरु आज्ञा पड हाल्ला ओभोल ढंगीस मा मोनयाजगा तइ।” ¹⁰छुलोनमा मुसास रिडशिज तोह, “आनु आम्मा रड आनु बाबो आदर लान, आए हाइसी आम्मा रड बाबा पड माज लोतोह, दोह पड जरुर सारेह। ¹¹पर किह लोचगा तइ हाइसी आनु आम्मा रड बापु पड लोनमा, छगिड आड दोक्च किनजु लाभ हाचिम रूमोग, दोह कोरबान, मतलब परमेश्वरु ओचिशीज तोह। ¹²दोनिम किह दोह पड आनु आम्मा रड बाबाओ छची सेवा लानमो मा शेचगा तइ। ¹³होज्जु वजेस किह किन रिति-रिवाजोतु ताइएस, छगिड नियमोतु किह बन्नयाया रूड, परमेश्वरु वचन मा

मोनयाजगा तइ; आए होजेस्के-होजेस्के मुलूक कामड लानजगा तइ।

मिहतु अशुध्द लानमोगा बातडहा

¹⁴दोनिम यीशुस मिहतु आनु दवा आरयाया, दोगोतु लोइक्यो, "किह चइ आड बातडहा थासी" आए सोमझेइ। ¹⁵होजेस्क छ्ची चीज माये, छौंगिड बेरिडज मिहु कुमो ब्योब्यो दोह पड अशुध्द¹ लानतो, पर छौंगिड चीजो मिहतु कुमोज दवा तिश, होदोसी मिह पड लाकिया लानतो। ¹⁶[पर हातुइ रेनचिमो कानडहा रूड, दोगोस थासी/] ¹⁷तेबेरोइ यीशु भीइ दोक्च किमो ब्योक्चो, देबेरो दोह चेलगास जु उदाहरणु बारेओ दोह दोक्च ऐक्याश। ¹⁸दोहस दोगोतु लोइक्यो, "किह ली छौंग छ्ची मा सोमझेचगा तइया? किह छौंग मा सोमझेजे तइया, छौंगिड चीज बेरिडज मिहु कुमो ब्योतो, दोहस दोह पड लाकिया मा लान? ¹⁹छुलोनमा दोह चीज दोह मोनड मानी, पेटिडहो ब्योतो, आए पेटिडज बेरिड दोहतो?" होज्जय लोहलोह दोहस चइ जामोगा चीजोतु चोकोस तिश लोइक्यो। ²⁰दोनिम दोहस लोइक्यो, "छौंगिड मिहु कुमोज दोच्या नितोह, होदोसी मिह पड लाकिया लानजया नितोह। ²¹किशो कुमोज लोनमा, मिहतु मोनडहोज, माजा-माजा विचारो, अनैतिक यौन सम्बन्ध, चोरी लानमो, खुन लानमो, हाइदू नार निमस्कोज ब्योमो, ²²लालच, दुष्टता, छल, बदतमीज, जलन, निन्दा, शेखी रड मुख बातडहा दोचगा तिश। ²³जुह चइ माजा बातडहा मिहतु कुमोज ही दवाचगा नितिश, आए मिह पड अशुध्द लानजगा नितिश।"

¹ 7:15 लाकिया लानतो

¹ 7:16 इदेह शास्त्रोपो 16 आयत मा चेशीज तोह।

इद छेचमिऊ विश्वास

²⁴दोनिम यीशु होदोह जागोज सारशीस सुर^k देशड बड़क्यो, आए इद किमो ब्योक्यो आए गयाया तेक्यो हाइसी मानेज गयाश, पर दोह माडशीश निमो मानगयो। ²⁵आए फटक इद छेचमिस, हातुइ गाट्टो चिम्मे पड भूत लागेगे तेक्यो, दोह चर्चा थासथास बड़क्यो, आए दोह बाडहापो बरालक्यो। ²⁶जुह छेचमि यूनानी आए सीरिया देशडहु फिनीकी जागोज तेक्यो। दोहस दोह दोक्च विनती लानगयो, चिम्मेयो कुमोज भूत पड तवात। ²⁷यीशुस दोह पड लोइक्यो, “ओमस छाडहातु गरिडमो शेत, छुलोनमा छाडतु रोट लिगशीस कुवेतु ओमस्को शेनमो दाम माय।” ²⁸दोह छेचमिस यीशु पड जबाब रानगयो “सोच तोह प्रभु; कुवेस ली ताह, छाडस ज़ामो बेरड बोचेशीजा टुकरगा जातिश। ²⁹दोहच यीशुस लोइक्यो, जुह बातड ताइएस काह ब्योह, भूत कान चिम्मेयो कुमोज दवादवा तोह।” ³⁰दोहस आनु किमो बहबह ताडगयो, चिम्मे चारपाइ देन यागशीस तोह आए भूत ली दवादवा तोह।

लाटस रड ठोठोलशीजया मिह पड चंगा लानमो

³¹दोनिम दोह सुर देशडज दहदह, दिकापुलिस मतलब साए-नगरु ओमोस सिदोन हाचिस गलीलु सोरडहु दवा पड़क्यो। ³²दोनिम मिहस इद लाटसु हाति ठोठोलशीजया तेक्यो, यीशु दवा करकर दोह दोक्च विनती लानगयाश, कान गोद दोह देन तोह। ³³दोनिम यीशुस दोह पड भीडोज याइ फयोक्यो, आए आनु पराचा दोह कानडहा पोह शेक्यो, आए थुक्याया दोह लेह पड छुयागयो; ³⁴आए स्वर्ग

^k 7:24 हाइदे हस्तलिपिगापो सुर रड सिदोन देशड चेशीज तोह।

बिलड खिहखिह लाम्बस सासड उनगयो, आए दोह पड लोइक्यो, “इप्फतह!” मतलब “खुलेत”! ³⁵फटक दोह कानडहा दोड गयाश, आए दोह लेयो गान्ठड दोइक्यो, आए साफ-साफ बातेस्मो देगयो। ³⁶दोनिम यीशुस दोगोतु चेतावनी रानगयो, हातुइ थाह लोहरे, पर तोइड दोहस दोगोतु चेतावनी रानगयो होदोइ दोगोस आए पराडमो देगयाश। ³⁷दोगोह मुलूक बिशारेरे लोच तेक्याश, “दोहस छौंगिड लानमोग, चइ ओभोल लानमोग; दोहस लाटस मिगातु थासमो जड, आए मा बातेस जगा मिहतु बातेसमोग सोतिड रानज्या तोह।”

पह हजार मिहतु खाऊ रानमो

8 दोह दयारोपो हेस्स इद दयार मुलूक मिह जामशीगयाश आए दोगोह दवा छ्ची जामो मा रुगयाश, दोनिम यीशुस आनु चेलगातु आरयाया दोगोतु लोइक्यो। ²हुन्ना नुगो दवा जामो छ्ची मारूश, छुलोनमा जुगो शुम दयारेज लागातार आड रड तिश, आए आडजु नूह मिहतु देन तरस बदो रुह। ³अगर गह नुगोतु उपासड किमोजु शेकिक ताह, नुगो ओमोइ छागछाग नितिश, छुलोनमा नुगोतु माजो इदे-इदे मिह वारक्योज बहबह तिश। ⁴चेलगास यीशु पड ऐक्याश, “होजोर बोनिडहो होनो रोटे, हाइस हामच करतो जुगो गरिकच गयाश?” ⁵दोहस दोगोतु ऐक्यो, “किन दवा तोह रोटे रूड?” दोगोस लोइक्याश, “स्तीश।” ⁶दोनिम यीशुस मिहतु धरतीऊ देन तोशीमो हुकुम रानगयो, आए दोह स्तीश रोटे ऊनगयो आए परमेश्वरु धन्यावाद लानलान खानयागयो, आए आनु चेलगातु रानो ब्योक्यो, छुलोनमा दोगोस मिहतु रानजगयाश, आए दोगोस मिहतु कागो ब्योक्याश। ⁷दोगोह दवा दोकिच गान गाट्टो मच्छलीगा ली रूगयाश, दोहस परमेश्वरु धन्यावाद लानलान दोगोतु ली मिहतु काडमो रानगयो। ⁸दोगोह जाजा गरिक्याश आए चेलगास बचेचा

टुकरगास स्तीश छाटोगा पडपड थोगयाश। ⁹आए मिह तकरिबन पह हजार दौह तेक्याश, दोनिम दोहस दोगोतु विदा लानगयो, ¹⁰आए यीशु फटक आनु चेलगा रड किशतीउ देन तोशीस, दलमनुता प्रदेशो जुह ब्योक्यो।

फरीसीगास यीशु पड स्वर्गू सार जाडच लोनमो

¹¹दोनिम फरीसीगा बहबह दोह रड बहस लानमो देगयाश, आए दोह पोरखयामो ताइएस दोह जड परमेश्वरु दोक्च स्वर्गोज बनमोग, सार जाडचिस साबित लान लोइक्याश। ¹²दोहस आनु आत्मो आह! उनउन लोइक्यो, “जुह वक्तु मिगास छुह सार पोचिजगा तिश? गह किनजु सोच रिडहो रूग होज्जु वक्तु मिगातु छची सार मा पोरेत।” ¹³आए दोहस दोगोतु छारयाया हेस्स किशतीउ देन चढ्ढेक्यो आए नड ब्योक्यो।

फरीसीगा रड हेरोदेसु सुरग चिसड

¹⁴चेलगास रोटे फ्योमो बोशीस तेक्याश, आए किशतीउ देन दोगोह दवा इद ही बुदरू रुगयाश। ¹⁵दोहस दोगोतु चेतावनी रानरान लोइक्यो, “खिह, फरीसीगातु सुरग चिसड रड हेरोदेसु सुरग चिसड दोक्च बोचेचे निहरे।” ¹⁶दोगोह आनेतु माजो राया लानलान लोशीगयाश, “किशो दवा बुदरू मा रुमे।” ¹⁷होज्जे नेहनेह यीशुस दोगोतु लोइक्यो, “किह छुह किन कुमो होज्जय राया लानो रूड, किशो दवा बुदरू मा रुमे? किह छौंग हुनस स्तड मा नेओ रड आए मा सोमझेदो रूडया? किन दिमागीस छौंग कामड मा लानो रुहा? ¹⁸मीगा निहनिह ली छौंग मा ताडहो रूडया, आए कानडहा निहनिह ली मा थासो रूडया? आए किनजु छौंग याद मा रूडया, ¹⁹तेबेरोइ गह डहा हजार मिहतु ताइएस

इहा रोटे खानयागिक दोनिम किह टुकरगास पडपड तोह छाटटो थोहगे?" दोगोस दोह पड लोइक्याश, "सोनिश छाटोगा।" ²⁰आए तेबेरोइ पह हजार मिहतु ताइएस स्तीश रोटे तेहके, दोनिम किह टुकरगास पडपड तोह छाटोगा थोहगे?" दोगोस दोह पड लोइक्याश, "स्तीश छाटोगा।" ²¹दोहस दोगोतु ऐक्यो, "किह छौंग हुनस स्तड मा सोमझेकेहा?"

बैतसैदो इद ताबसो पड ठीक लानमो

²²दोगोह बैतसैदा बइक्याश; आए मिहस इद ताबसो पड यीशु दवा करगयाश आए दोह दोक्च विनती लानगयाश, किह दोह पड छुयो। ²³यीशुस दोह ताबसो पड गोद चुमचुम दोह पड गोनिडज बेरिड फ्योक्यो, आए दोह मीगापो थुक्यागयो आए गोद ताहताह, दोह जड ऐक्यो, "काह छौंग ताडहो रून?" ²⁴दोहस बाल सारसार लोइक्यो, "गह मिहतु जड वेनजगा बोठडहा गान ताड रूग।" ²⁵दोनिम दोहस हेस्स दोह मिगापो गोह तागयो, आए ताबसोस ध्यानिस खिहगयो। दोह ठीक हाचिगयो, आए चइ साफ-साफ ताडज तेक्यो। ²⁶यीशुस दोह पड होज्जय लोहलोह "किमो शेक्यो, वापस गानिडहू कुमो थाह ब्योरा।"

पतरसीस यीशु पड मसीह मोनयामो

²⁷यीशु रड दोह चेलगा कैसरिया फिलिप्पीयु गाँनिडपो ब्योक्याश। ओमस दोहस आनु चेलगातु दोक्च ऐक्यो, "मिहस आड हात तोह लोशीजगा तिश?" ²⁸दोगोस उतर रानगयाश, "इदेस युहन्ना बपतिस्मा रानज्या, इदेस एलिय्याह आए इदे-इदेस भविष्यवक्तगा पोज इद तोह लोशीजगा तिश।" ²⁹दोहस दोगोतु ऐक्यो, "पर किह आड हात तोह, लोशीजगा

तइ?" पतरसीस यीशु पड लोइक्यो, "काही मसीह' तन।"
³⁰दोनिम यीशुस दोगोतु चेतावनी रानरान लोइक्यो, आड
 बारेओ होज्जय हातुइ थाह लोहरे।

यीशुस शिमो रड दुखडहु बारेओ लोनमो

³¹दोनिम यीशुस चेलगातु सिखयाज तेक्यो, मिहऊ छाडहु
 मुलूक दुखड थोमो जरुरी तोह, आए स्यानोस रड प्रधान
 याजकोस, आए शास्त्रीगास फोइ चालचाल मा मोनयास।
 दोनिम दोह पड साताश आए दोह शुम दयारु निम शडतो।
³²यीशुस होज्जु बातड दोगोतु साफ-साफ लोइक्यो। होज्जु
 देनज पतरसीस दोह पड याइ फ्योफ्यो डाँटयो तेक्यो, ³³दोनिम
 यीशुस पोलटेटे आनु चेलगातु बिलड खिगयो, आए पतरसु
 डाँटयाया लोइक्यो, "हे शैतान, आड ओमस्कोज वारक्यो ब्यो,
 छुलोनमा काह परमेश्वरु बातडहातु देन मानी, पर मिहतु
 बातडहातु देन मोनड शेचया तन।"

यीशु निमस्कोज वेनमोगु मतलब

³⁴दोनिम यीशुस आनु चेलगा रड भीडू जड आनु दवा
 आरयाया, दोगोतु लोइक्यो, "हाति आड निमस्कोज बनमो
 गयातो, दोहस आनु ली इंकार लानरे आए आनु कूस"^m
 थोहथोह, आड निमस्कोज जिहरे। ³⁵छुलोनमा हाइसी आनु
 डेयडहु जिन्दगी बोच्यामो गयातो दोहस जिन्दगी पड शोह
 शेहतो, पर हाइसी आड रड सुसमाचारु ताइएस आनु डेयडहु

¹ 8:29 परमेश्वरु बिनयाशीज खास मिह हाति बनमो रुमोग।

^m 8:34 दुखड, कोष्ट रड शीमो जड तैयार निमो।

जिन्दगी शोह शेहतो, दोहस जिन्दगी पड हासील लानतो।
³⁶अगर मिह पड चड संसार ली पोरेनमा आए आनु जिन्दगीऊ पड नुकसान हाचिमा, दोनिम दोह पड छौग फायदा हाचचो?
³⁷मिहस आनु जिन्दगीऊ बोदला छौग रानतो? ³⁸हात ली जुह व्यभिचारी रड पापी पीडिऊ माजो, आड रड आए आड बातडहा दोक्च सोरमयाशो, आए मिहऊ छाड ली तेबेरोड दोह पवित्र दूतो रड आनु बाबो महिमा रड बतो, देबेरो दोह दोक्च सोरमयाशो।”

9 यीशुस दोगोतु लोड्क्यो, “गह किनजु सोच रिडहो रूग हातेड होज्जा डेन तिश, दोगोतु माजिड इदे-इदे होजेस्के तिश, तेबेर स्तड परमेश्वरु राज पड सोतिड रड बच मा ताडश, दोहस स्तड दोगोह मा शिश।

यीशुस रूवड स्कालमो

²टोग दयारु निम यीशुस पतरस, याकूब आए युहन्ना पड आनु रड फ्योक्क्यो, आए ऐकानडहो हादह राडक डोखडहु देन फ्योक्क्यो। होदाह दोगोतु ओमस्को रूवड स्कावलगयो, ³आए दोह गास्सा होन्ने चमकेदो तेक्याश आए होनो छौग हाचिगयो, धरतीऊ देन हात ली गास्सा चिज्यास होदेस छौग मा लान।
⁴आए चेलगातु मुसा रड एलिय्याह ताड देगयो; दोगोह यीशु रड बातयाशो तेक्याश ⁵होज्जु देनज पतरसीस यीशु पड लोड्क्यो, “हे गुरु जी, किशो होज्जा निमो दाम तोह: होज्जु नुस निह शुम छन्नी जुरयात्मा; इद कान ताइएस, इद मुस्सो ताइएस, आए इद एलिय्योह ताइएस।” ⁶दोह मा नेच्या तेक्यो छौग उतर रानग? छुलोनमा दोगोह मुलूक भयाड-भयाड तेक्याश। ⁷दोनिम दुडड जाबजाब दोगोतु छिक्क्यो, आए दुडडहु कुमोज होज्जय बातड

थास्मो बइक्यो, “जुह आड प्यारा छाड तोह, जुह थासी।” ⁸दोनिम दोगोस फटक चइ बिलड नजर शेक्याश, आए यीशु सिवाय, आने रड हातुइ मा ताड गयाश। ⁹डोखडहु देनज जाम्मो बेरड यीशुस दोगोतु हुकुम रानगयो, तेरड स्तड मिहु छाड शिजातु माजिडज शडग मा हाच, दोहस स्तड किह छौंगिड ताडताड तइ दोह हातुइ थाह लोहरे। ¹⁰दोगोस जुह बातडहु याद तागयाश; आए आनेतु कुमो बहस लानो तेक्याश, “शिजा पोज शड हाचिमो छौंग मतलब तोह?” ¹¹आए दोगोस यीशु पड ऐक्याश, “शास्त्रीगास छुह लोचगा तिश; एलिय्योह ओमस बनमो जरुरी तोह?” ¹²यीशुस दोगोतु उतर रानगयो, “सच्ची, एलिय्योह ओमस बहबह चइ ओभोल लानतो, पर मिह छाडहु बारेओ होज्जय छुह चेशीज तोह, दोह पड मुलूक दुखड पोरेतो, आए मामुली नारशो? ¹³पर गह किनजु रिडहो रूग, एलिय्याह ताह बहबह तोह, आए हाल्लिडहि दोह बारेओ चेशीज तोह, मिहस हाल्लिडहि गयाचगा तेक्याश, दोह रड बुरा लानमोगा।”

भूत लागेच छाडहु ठीक लानमो

¹⁴तेबेरोइ यीशु पतरस, याकूब आए युहन्ना रड हाइदे चेलगा दवा बइक्यो, दोनिम ताडगयो किह दोगोतु फिरकोट मुलूक मिह जामशीस तिश आए शास्त्रीगास दोगोह रड बहस लानो रूश। ¹⁵यीशु पड ताडमो निम मिह मुलूक बिशारेक्याश, आए दोह बिलड ठुरेरे दोह पड नमस्कार लोइक्याश। ¹⁶यीशुस दोगोतु ऐक्यो, “किह जुगो रड छौंग बहस लानो रूड?” ¹⁷भीडू माजिडज इद मिहस यीशु पड उतर रानगयो, “हे गुरु जी, गह आड छाडहु जड, हातुइ लाटस लानजया भूत लागेगे तोह, कान दवा करकर रूगीक। ¹⁸हामिड-हामिड भूतिस दोह पड चुमज्या तोह,

होदाइ फिक्याया शेचया तोहः दोहस खाकड शेपु पडपड करजया तोह, गारा कोट्टयाज्या तोह आए डेयड शकलज्या तोह। गह कान चेलगातु लोइकिक किह भूतु जड तोइ, पर दोगोस तनमो मानमोगा।” ¹⁹होज्जे थासथास दोहस दोगोतु उतर रानरान लोइक्यो, “हे अविशवासी मिहगा, गह तेबेर स्तड किन रड नितुक? आए तेरड स्तड किन सहन लानो नितुक? दोह पड आड दवा कइ।” ²⁰दोनिम दोगोस दोह पड यीशु दवा करगयाशः आए तेबेरोइ भूतिस यीशु पड खिहगयो, दोनिम भूतिस छाडहु फटक मेक्याया माटिडहु देन बरालक्यो, आए खाकडज शेपु तवादो बरिनलेदो तेक्यो। ²¹यीशुस दोह बाबा दोक्च ऐक्यो, “जुह होजेस्क हालात तेपोक्च निम रूह?” दोहस लोइक्यो गाटोचुम्याक्ची रूह। ²²भूतीस जुह पड खत्म लानमो ताइएस तेबेर मेह दोर आए तेबेर तिऊ दोर फरालमोग, अगर काह छौग लानमो थानमा, निड देन तरस ताडताड ऐसान लान।” ²³यीशुस दोह पड लोइक्यो, “अगर काह लानमो थानमा?” जुह छौग बातड तोह! विशवास लानजया पड चइ मुमकिन तोह।” ²⁴छाडहु बाबास फटक पोरज्याया लोइक्यो, “हे प्रभु, गह विशवास लानो रूग, आड अविशवासु उपाय लान।” ²⁵तेबेरोइ यीशुस ताडगयो मिह ठुरेरे भीडू हाच्यो रुश, दोनिम दोहस भूतु जड होज्जय लोहलोह डाँटयागयो, “हे टोनहो रड लाटस आत्मा, गह कानजु हुकुम क्यो रूग, छाड कुमोज दवात, आए हेस्स चोंगे थाह लागेरा।” ²⁶दोनिम भूत टोकेके आए छाडहु मुलूक मेक्याया, दवाइक्यो; आए छाड शिज गान हाचिगयो, होज्जेस हालात हाचिगयो मुलूक मिह लोशीज तेक्याश, दोह शिग। ²⁷पर यीशुस छाडहु गोद चुमचुम सारगयो, आए दोह डेन सारशीगयो। ²⁸तेबेरोइ यीशु किमो बइक्यो, दोनिम यीशु चेलगास ऐकान्न्डहो यीशु दोक्च ऐक्याश, “निह भूत पड छुह तोनमो मान किमा?”

²⁹दोहस दोगोतु लोइक्यो, “जुह किस्मु आत्मा बेगेर प्रार्थनो, आइ छची तरीकास मा दोत।”

यीशुस आनु मौतु बारेओ हेस्स लोनमो

³⁰यीशु रड दोह चेलगा होदोक्च दोइक्याश आए गलील हाचिस ब्योच तेक्याश। दोह इच्छा रुगयो “हाइसी मा नेजिज गया गह हाम तुक”, ³¹छुलोनमा यीशुस आनु चेलगातु सिखयाज तेहक्यो आए दोगोतु लोच तेक्यो, “मिहु छाडहु जड, मिहतु हवाले लानताश, आए दोगोस दोह पड साताश; आए दोह शिमो निम शुम दयारेज शड हाच्यो।” ³²पर जुह बातडहु मतलब चेलगातु सोमोज मा देगयो, आए दोगोह यीशु दोक्च ऐहमो भयाडचगा तेक्याश।

चइके पोज तेग हात तोह?

³³दोनिम दोगोह कफरनहूम शहरो बइक्याश आए किमो बहबह यीशुस चेलगातु ऐक्यो, “ओमापोस किह छौग बातडहु देन बहस लानो तेहके?” ³⁴दोगोस छची मा लोइक्याश, छुलोनमा ओमापो दोगोस आनेतु कुमो होज्जय बहस लानलान रुगयाश, किशो माजिडहो चइके पोज तेग हात तोह। ³⁵दोनिम यीशुस तोशीस सोनिश चेलगातु आरयागयो आए दोगोतु लोइक्यो, “अगर हातिस तेग हाचिम गयामा, दोनिम दोह चइके पोज निमस रड चइकेतु सेवक हाचिरे।” ³⁶आए यीशुस इद छाडहु जड दोगोतु माजिड डेन लानगयो, आए दोह पड थोम्मपो थोहथोह, दोगोतु लोइक्यो, ³⁷“हाइसी आड नामडस होज्जेस्के छाडहातु माजिडज हात ली इद छाडहु जड मोनयातो, दोह आडजु जड मोन्याजो, आए हाइसी आडजु मोनयाजिज्या तोह, दोहस आड मानी, पर आड शेचिज्या पड मोनयातो।

हाति खिलाफ मायश दोगोह किशो बिलड तिश

³⁸दोनिम युहन्नास यीशु पड लोड्क्यो, “हे गुरु जी, निह इद मिह पड कान नामडस भूतोतु तोच ताडगीमा आए निह दोह पड मना लानो तेकिमा, छुलोनमा दोह किशो निमस्कोज मा बच्या तोह।”
³⁹यीशुस लोड्क्यो, दोह पड मना थाह लानी; छुलोनमा होज्जेक हाति माय, हाइसी आड नामडस सोतिडहु कामडहा लानज गया; आए फटक आडजु माज रिडमो मान, ⁴⁰छुलोनमा हाति किशो खिलाफ मायश, दोगोह किशो बिलड तिश। ⁴¹हाइसी इद गिलास तिह ली किनजु होज्जु ताइएस तुडमो केतो, किह मसीऊ तइ, दोनिम गह किनजु सोच रिडहो रूग, दोहस आनु बदला हाल्लाहि शोह मा शेत।

पाप लानमो शेनमोगु कारण हाचिमो

⁴²“हाइसी जुह गाटोतु माजो हातेइ आड देन विशवास लानजगा तिश, हातुली पाप लानमो शेनमोगु कारण हाच्यो, होदोह जड होज्जय दाम तोह इद तेग गोटडहु राग दोहस काक्चो शेहशेह आए दोह पड सोमोदरडहो शेनमा। ⁴³अगर कान गोदिस कान दोक्च पाप लानमो शेचिमा, दोनिम दोह पड मोलमोल शेत, टुन्डो हाचिस सौदाचु जिन्दगी पोरेनमो दाम तोह, निश गोह निहनिह ली नरकु मेह दोर ब्योम खाम्मोगोज, हामि चोंगे मेह मा बिग, कान ताइएस होज्जय दामो दाम तोह। ⁴⁴[हामि दोगोतु होड मा शित आए मेह मा बिग।]”
⁴⁵अगर कान बाडहिस कानजु पापु ओम्मो फयोचिमा, दोह पड मोलमोल शेत, लेडरो हाचिस सौदाचु जिन्दगी पोरेनमो मुलूक दाम

तोह, बाडहास्या निहनिह नरको शेचिमोगोज, होज्जय दामो दाम तोह, ⁴⁶[हामि दोगोतु होड मा शित आए मेह मा बिग।] ⁴⁷अगर कान मीगीस कान दोक्च पाप लानमो शेचिमा, दोनिम दोह पड तोहतोह फिक्क्याया शेत, ताबसो हाचिस परमेश्वरु राज ब्योमो मुलूक दाम तोह, निश मीगास्या निहनिह नरको ब्योमोगोज, होज्जय दामो दाम तोह। ⁴⁸हाति होडहास दोगोतु जातिस दोगोह होडहा चोंगे मा शिश, आए मेह ली मा बिग। ⁴⁹इद-इद मिहतु मेहस शुध्द लानताश, हाल्लिडहि बलि पड छाहस नमकीन^० लानताश ⁵⁰छाह ताह दाम तोह, पर अगर छौह स्वाद ब्योमा, दोनिम दोह पड छगिस नमकीन लानतई? किन कुमो छाह ताइ, आए किन-कुमो गालशीस निहरे।

शिड चडमो बारे उपदेश

10 दोनिम यीशु सारशीस यहूदियो सीमडस हाचिस आए यरदनु नदी नड बड्क्यो। भीडू दोह दवा हेस्स जामशीगयाश, आए दोहस हेस्स ओम्मचु गान उपदेश रानमो देगयो। ²दोनिम फरीसीगास दोह दवा बहबह दोह परखयामो ताइएस दोह जड ऐक्याश, “होज्जय छौग ठीक तोहा छोडमिस आनु छेचमिह पड शिड चडमो लोनमो?” ³दोहस दोगोतु उतर रानगयो, “मुसास किनजु छौग हुकुम कैहकै रूह?” ⁴दोगोस लोड्क्याश, “मुसास राजीनामा चेहचेह शिड चडमो हुकुम केहके रूह।” ⁵यीशुस दोगोतु लोड्क्यो, “मुसास किन ताइएस जुह हुकुम होज्जु नुस चेहचेह रूह, किह परमेश्वरु हुकुम मोनयामो तैयार माएके। ⁶आए बन्यामोगोज ओमच

^० 9:49 यहूदिगातु रिति मुताबिक बलिगातु नमकिन लानजगा तेहक्याश लैव्य 2:13

परमेश्वरीस छेचमि रड छोडमि रूवडहो दोहसडहु बन्याया रूह।
 7होज्जु नुस छोड मिह आनु आम्मा रड बाबो दोक्च यायी हाचिस,
 आनु नार रड निहतो, 8आए दोहसड इदही डेयड हाचसड, ऐब्बे
 दोहसड निश डेयड मानी, पर इदही डेयड तसड। 9होज्जु नुस
 हातेतुइ परमेश्वरीस जोडयाया रूह, दोहसडहु मिहस यायी थाह
 लानरे। 10किमो चेलगास जुह बारेओ दोह दोक्च हेस्स ऐक्याश।
 11दोहस दोगोतु लोइक्यो, “हाइसी आनु नारू शोठ्ठयाया हाइद रड
 शादी लानतो, दोनिम दोहस दोह ओमचे नारू खिलाफ व्यभिचार
 लानतो; 12आए अगर छेचमिस आनु पति पड शोठ्ठयाया हाइद
 रड शादी लानमा, दोनिम दोहस व्यभिचार लानतो।”


छाडहातु आशीर्वाद

13दोनिम मिहस छाडहातु यीशु दवा करोह तेक्याश, ताकि दोहस
 दोगोह देन गोद ताजगया, पर चेलगास दोगोतु डाँटया गयाश।
 14यीशुस होज्जय ताडमो निम रोषड ताडताड दोगोतु लोइक्यो,
 “छाडहातु आड दवा बनमो शेइ आए दोगोतु मना थाह लानी,
 छुलोनमा परमेश्वरु राज होज्जेस्केतुइ मिहतु तोह। 15गह किनजु
 सोच रिडहो रूग, हाइसी परमेश्वरु राज पड छाड गान मा मोनयो,
 दोह परमेश्वरु राज कुमो चाँगे मा ब्योह।” 16आए दोहस छाडहातु
 थोम्मपो स्तोशतोह दोगोह देन गोद ताहताह आशीष रानगयो।

सोऊकार मिह

17तेबेरोइ यीशु होदोरज दहदह ओमोस ब्योच तेक्यो, दोनिम इद
 मिह ठुरेरे दोह दोह दवा बइक्यो, आए दोह ओमस्को पशबाडहा
 टेक्याया दोह जड ऐक्यो, “हे दामक गुरु जी, सौदाचु अस्ली जिन्दगी
 हासील लानमो ताइएस आड छाँग लानमो जरुरी तोह? 18यीशुस दोह

पड लोइक्यो, “काह आडजु दामक छुह रिडहो रून? हाति दामक माय, सिवाये इदु लोनमा परमेश्वरु।¹⁹काह नियमोतु जड ताह नेच्या तनः खुन थाह लानरे, कान जीवन साथी रड धोखा थाह लानरा, चोरी थाह लानरा, झूठा शादत थाह हाचिरा, धोखा थाह लानरा, आनु आम्मा रड बाबो आदर लानरा।²⁰दोहस दोह पड लोइक्यो, “हे गुरु जी, जुह चड हुकुमोतु गह गाट्टोमयाक्की मोनयो बदो रूग।”²¹यीशुस दोह जड खिहखिह दोह पड बेन्नड लानगयो, आए दोह जड लोइक्यो, “कान कुमो इद बातडहु कमी रून। ब्यो-छौगिड कान दवा रून दोह पड रेहरेह गरीबोतु रान, आए कानजु स्वर्गो धन पोरेतो, आए बहबह आड निमस्कोज पाए।”²²जुह बातडहु देनज दोह स्थो जाबक्यो आए उदास हाचिगयो, आए दोह दुखी हाचिस ब्योक्यो, छुलोनमा दोह मुलूक सोऊकार तेक्यो।²³यीशुस चेलगातु बिलड खिहखिह लोइक्यो, “सोऊकारोतु परमेश्वरु राज ब्योमो तोह कठिन तोह!”²⁴चेलगा दोह बातडहा देनज विशारेक्याश। जुह देनज यीशुस हेस्स दोगोतु लोइक्यो, “हे आड छाडहा, परमेश्वरु राज कुमो ब्योमो तोह मुशकिल तोह!”²⁵परमेश्वरु राजो कुमो सोऊकारोतु ब्योमोगोज केबचु मिगोस ऊंट दोनमो आसान तोह!”²⁶दोगोह मुलूक विशारेरे आनेतु कुमो लोशीज तेक्याश, “दोनिम हातु मुक्ति हाच्चो?”²⁷यीशुस दोगोतु बिलड खिहखिह लोइक्यो, जुह मिहतु ताइएस ना मुमकिन



ऊंट (10:25)

^P 10:24 इदेह चेशीजा शास्त्रोपो चेशीज तोह हातेइ धनु देन बरोसा ताजगा तिश दोगोतु ताइएस स्वर्गो ब्योमो तोह मुशकिल तोह

तोह, पर परमेश्वरु ताइएस मुमकिन तोह; छुलोनमा परमेश्वरु दोक्च चइ हाच्चो।” ²⁸दोनिम पतरसीस दोह पड लोच तेक्यो, “खिरू, निहता चइ चीजो शोट्टयाया कान निमस्कोज हाचिस तनमा।” ²⁹यीशुस लोइक्यो, “गह किनजु सोच रिडहो रूग, हाति होजेस्क माय, हाइसी आड ताइएस रड सुसमाचारू ताइएस किम-रिम अम्मा रड बाबा, बाजा-रिडजा रड छाडहातु शोट्टयाया रूह, ³⁰आए हुन्ना होज्जु वक्तो युडजा-रिडजा छाडहा रड आमगातु किमा-रिमातु जड राह गुणा बोदी, मिहु विरोध रड बच्या दुनियो सौदाचू जिन्दगी। ³¹आए मुलूक मिह हातेइ हुना जुह दुनिया तेगे तिश, दोगोह गाट्टो हाचिस; आए हातेइ हुना गाट्टो तिश, दोगोह बच्या दुनियो तेगे हाचिस।”

आनु मौतु बारेओ यीशुस शुम जबचु बेरड लोनमो

³²दोगोह यरुशलेम ब्योम बेरड ओमोस तेक्याश, आए यीशु दोगोतु ओमस-ओमस ब्योच तेक्यो: चेलगा बिशारेरे तेक्याश आए हातेइ मिह निमस-निमस वेनो तेक्याश, दोगोह भयाड-भयाड तेक्याश। दोनिम यीशु हेस्स सोनिश चेलगातु यायी फ्योफ्यो दोगोतु दोह बातडहा लोच तेक्यो छगाइ दोह देन बितेनमो रूगयाश ³³“खिह, किशा यरुशलेमजु ब्यो रूमे, आए मिहऊ छाड प्रधान याजकोतु रड शास्त्रीगातु गोपोज चुमशो, आए दोगोस दोह पड मौतु सजा काबिल ठहरयाताश, आए गैर यहूदीगातु गोदोह रानताश ³⁴दोगोस दोह ठाट्टे लानताशा, दोह देन थुक्याताश, आए दोह पड कोडगास ठिसताश आए दोह पड साताश, आए शुम दयारे हेस्स शडतो।”

याकूब रड यूहन्नो विनती

³⁵दोनिम जबदिऊ छाडहा याकूब रड युहन्ना यीशु दवा बहबह लोइक्याश, “गुरु जी, निसी गयाया तहच, छगिड निसी कान

दोक्च ऊनच्छ, दोह काह निसीऊ ताइएस लान। ³⁶यीशुस दोहसडहु ऐक्यो, “किसी छौंग गयाया तहच गह किसीऊ ताइएस लानग?” ³⁷दोहसड दोह पड लोइक्याश, “निसीऊ होज्जु होक केह, काह सोतिडहु शासन सुंहासन देन तोशीबेरो, निसीऊ माजो इद कान जाखड बिलड आए इद कान खोजजिड बिलड तोशीज गयाच।” ³⁸यीशुस दोगोतु लोइक्यो, “किसीऊ पता मा रुच, किसी छौंग ऊनचो रुच? छगिड दुखडहु कोलिच गह तुडमो रुग, किसी दोह पड तुडमो थानताचहा? आए छगिड बपतिस्मा गह ऊनमो रुग, किसी छौंग ऊनमो थान ताचहा?” ³⁹दोहसडस यीशु पड लोइक्याश, “निसी लानमो थानताच।” यीशुस दोगोतु लोइक्यो, “छगिड कोलिच गह तुडमो रुग, किसी तुडताच; आए छगिड बपतिस्मा गह ऊनमो रुग, दोह पड ऊनताच।” ⁴⁰आए हातेतुइ ताइएस परमेश्वरस तैयार लानशीज तोह, दोगोतु सिवाय आए हातु जड ली आड जाखड रड आड खोजिड स्थोनमो आड दाह होक मा रुग।” ⁴¹होज्जे थासमो निम आए साय चेलगातु, याकूब रड युहन्नो देन रोषड देगयाश। ⁴²दोनिम यीशुस दोगोह चइकेतु ओशको आरयाया लोइक्यो, “किन पता रूइ, हातेइ गैर यहूदीगातु देन शासक तिश, दोगोह दोगोतु देन शासन लानजगा तिश, आए दोगोतु माजो हातेइ मुखियगा तिश दोगोह दोगोतु देन होक लानजगा तिश।” ⁴³पर किन माजो होज्जय माय किन माजो हाति महान बन्नेनमो गयातो, दोह पड चइकेतु सेवा लानमो खाबतो। ⁴⁴आए हाति किन माजो मुखिया बन्नेनमो गयातो, दोह पड चइकेतु दास बन्नेनमो खाबतो। ⁴⁵छुलोनमा मिहऊ छाड होज्जु नुस मा बहबह तोह, दोहस आनु सेवा लानमो शेनमो, पर आनीस सेवा लानमो ताइएस, आए मिहतु पापोज छुडयामो ताइएस आनु प्राण रानमो बहबह तोह।”

ताबसो बरतिमायु मीगा ठीक लानमो

⁴⁶दोगोह यरीहो शहरो बड़क्याश, तेबेरोइ दोह रड दोह चेलगा आए भीडू यरीहोज दोहच तेक्याश, देबेरो तिमाइऊ छाड बरतिमाइ लोनमोग इद ताबसो भिखारी, सोलकु नड तोशीस तेक्यो। ⁴⁷दोहस होज्जय थासक्यो दोह यीशु नासरी तोह, दोनिम दोहस जोर-जोरीस टोकेदो लोच तेक्यो, “हे दाऊदु छाड, यीशु आड देन दया लान।” ⁴⁸मुलुक मिहस दोह पड डाँटयागयाश चुटू निऊ, दोनिम ताह दोह आए ली मुलूक जोरीस टोकेनमो देगयो, “हे दाऊदु छाड, आड देन दया लान!” ⁴⁹दोनिम यीशुस रूकेके लोइक्यो, “दोहपड आरयाइ।” आए मिहस दोह ताबसो पड आरयाया दोह पड लोइक्याश, “हिम्मत तोह! सारश! दोहस कानजु आरयाजो रूह।” ⁵⁰आए दोहस आनु कापरा फिक्याया फटक सारशीगयो, आए यीशु दवा बड़क्यो। ⁵¹जुह देनज यीशुस दोह पड ऐक्यो, “काह छौंग गयाया तन, गह कान ताइएस लानग? दोह ताबसो मिहस यीशु पड लोइक्यो, “हे गुरु जी, गह होज्जय गयाया तुक, गह ताडज गयाक।” ⁵²यीशुस दोह पड लोइक्यो, “ब्यो, कान विशवासीस कानजु चंगा लानचिस रूह।” दोह पड फटक ताडमो देगयो आए ओम्मो यीशु निमस्कोज ब्योक्यो।


यरुशलेमो जोरदार स्वागत



जैतूनु डोखड (11:1)

तेबेरोइ दोगोह यरुशलेमु
11 ओशको, जैतूनु डोखडहु दवा बैतफगै रड बैतनियो ओशको बड़क्याश, दोहच यीशुस आनु चेलगातु माजो निशतु होज्जय लोहलोह शेक्यो, ²“ओमस्को

ज्यो गोनिड ब्योइ, आए दोह गाँनिड पदेरड इद फोचु छाड छुशीज किसीऊ पोरेतो। आए दोह देन हाति मिह चाँगे मा तोशीस तिश, दोह पड तोडतोड कइ। ³आए अगर किसीऊ हातेस एचिमा, किसी होज्जय छुह दोह रूच? दोनिम किसी लोहराच, प्रभु पड जुह जरूरत रूह, आए दोहस फटक दोह जड वापस



यरुशलेमो यीशु स्वागत
लानमो (11:8)

होज्जा शेतो।” ⁴दोनिम दोहसड होदोक्च ब्योक्याश, आए दोहसडस फोचु छाडहु इद गलियो खोलु बेरिड छुशीज ताडगयाश, दोनिम दोहसड दोह पड टोगयाश। ⁵हातेइ मिह होदाह डेन तेक्याश, इदे-इदेस दोहसडहु ऐक्याश, “होज्जय छुह दोह रूच, जुह फोचु छाडहु जड छुह टोहहो रूच?” ⁶हाल्लाइ यीशुस लोहलोह रूमोग, होदेइ दोसडस दोगोतु लोइक्याश दोनिम मिहस दोसडहूजड फयोमो शेक्याश। ⁷दोगोस फोचु छाडहु यीशु दवा करकर दोह थोग आनेतु गासा लादयागयाश, आए यीशु दोह थोग तोशीगयो। ⁸दोनिम मुलूक मिहस आनेतु गासा ओम्मो पोशक्याश, आए हाइदे मिहस रिमापोज बाराह थाबथाब ओम्मो पोशक्याश। छुलोनमा स्वागत लानमो ताइएस। ⁹हातेइ यीशु ओमस-ओमस रड निमस-निमस तेक्याश, दोगोह टोकेदो ब्यो तेक्याश, “होशाना!” ⁹ मतलब परमेश्वरु स्तुति हाचिज गया, हाति परमेश्वरु नामडस बच्या तोह, दोह पड परमेश्वरस आशीष रानतो। ¹⁰किशो बाबा दाऊदु राज पड, हाति बदो रूह, परमेश्वरस आशीषीत लानज गया! सोरगड होशाना।” ¹¹दोह

⁹ 11:9 परमेश्वरु तारिफ या जय-जयकार।

यरुशलेम पनमो निम मन्दिरो ब्योक्यो, आए चइ बिलड चइ चीजोतु खिहखिह, सोनिश चेलगा रड बैतनिया ब्योक्यो, छुलोनमा शुपेलिड हाचिस तेक्यो।



तिरमोलु बोठड (11:13)

बगैर फोलडहु तिरमोलु बोठड

¹²हाइद दयार तेबेरोइ दोगोह बैतनिया देशडज दोइक्याश, देबेरोइ यीशु पड ऊन्न देगयो। ¹³दोहस वारकोज इद तिरमोलु राग बोठड ताडगयो आए ओशको बयोक्यो, छौग पता दोगोह फोलड पोरेनमा, पर पाचडहातु सिवाय छची मा पोरेक्यो, छुलोनमा फोलडहु वक्त मायक्यो। ¹⁴जुह देनज यीशुस दोह बोठडहु लोइक्यो, “हुनक्च निम कान फोलड हाती मिहस चाँगे मा जाज गयाश!” आए दोह चेलगास रेनचो तेक्याश।

यीशुस मन्दिरोज सौदा रेचगातु तनमो

¹⁵दोनिम दोगोह यरुशलेम बइक्याश आए यीशु मन्दिरो ब्योक्यो, आए हातेइ होदोर सौदा लानो तेक्याश दोगोतु खेरयागयो, दोहस पैसातु लेन-देन लानजगातु मेजोतु फरालगयो आए कबूतर रेचगातु मेजो पौलटयागयो। ¹⁶आए मन्दिरु सान्थडहो छची चीजो करमो रड फ्योमो मा शेक्यो। ¹⁷दोनिम यीशुस उपदेश रानो दोगोतु लोइक्यो, “धर्मशास्त्रो होज्जय मा चेशीज तोहा, आड किम चइ जातिगातु प्रार्थना लानमोग स्थान नारशो? पर किह दोह पड डाकूगातु आढडा बन्याया रूड। ¹⁸होज्जे थासथास प्रधान याजको रड शास्त्रीगा दोह

सानमो ताइएस मौका पोचिज तेक्याश, दोगोह दोह दोक्च भयाडचगा तेक्याश छुलोनमा चइ मिह दोह उपदेश थासथास हैरान हाचिजगा तेक्याश। ¹⁹शुपेलिड हाचिमो निम, दोगोह नगरोज बेरिड ब्योक्याश।

छारज तिरमोलु बोठडहु दोक्च शिक्षा

²⁰हाइद सोम तेबेरोइ यीशु आनु चेलगा रड ब्योच तेक्यो देबेरो दोगोस दोह तिरमोलु बोठडहु, जिलड स्तड छारछार ताडगयाश। ²¹पतरसु दोह बातड याद देगयो, आए दोहस यीशु पड लोइक्यो, “हे गुरु जी, खिऊ! हाति तिरमोलु बोठडहु जड काह स्राप रानगिन, दोह छारछार तोह।” ²²यीशुस दोगोतु जबाब रानगयो, “परमेश्वरु देन विश्वास ताइ।” ²³गह किनजु सोच रिडहो रुग हाइसी जुह डोखड लोहतोह, काह दोहदोह सोमोदरड बयो, आए आनु मोनडहु कुमो शक मा लानमा, पर विश्वास लानमा, छगिड गह जोह रुग दोह हाचचो, दोनिम दोह ताइएस होदेइ हाचचो। ²⁴दोगिता गह किनजु रिडहो रुग, छौंगिड किह प्रार्थना लानलान ऊनतइ, दोनिम विश्वास लानरे किनजु पोरेक आए किन ताइएस हाचचो ²⁵आए तेबेरोइ किह डेन हाचिस प्रार्थना लानजगा तइ, देबेरो किन मोनड हात मिहऊ खिलाफ बातड रूइ, दोह पड माफ लानी, छुलोनमा किन स्वर्गू बाबास किन वामड दाशिजा कामडहातु बोदला किनजु ली माफ लानचिजगया। ²⁶[आए अगर किह माफ मा लानमा, दोनिम किन बाबा हाति स्वर्गो तोह, किन वामड लानशीजा कामडहा बोदला किनजु ली माफ मा लानच।”]

यीशु होकु बारे सवाल

²⁷दोनिम दोगोह हेस्स यरुशलेम बड़क्याश, आए तेबेरोइ दोह मन्दिरो हालेदो तेक्यो, देबेरो प्रधान याजक रड शास्त्रीगा आए स्यानोस दोह दवा बहबह ऐहच तेक्याश, ²⁸“काह जुह कामडहा छौंग होकिस लानजया तन? आए जुह होक कानजु हाइस केहके रूह, जुह कामडहा काह लान? ²⁹यीशुस दोगोतु लोइक्यो, “गह ली किन दोकच इद बातड एचिम रूग; आड जुह जबाब केइ, दोनिम गह किनजु रिडतुक, जुह कामडहा गह हातु होकिस लानजया तुक। ³⁰युहन्नो बपतिस्मा परमेश्वरु बिलडज तेहका या मिहतु बिलडज तेहक, आडजु जबाब केइ।” ³¹दोनिम दोगोस आनेतु कुमो बहस लानो तेक्याश, अगर किशा लोनमा ‘परमेश्वरु बिलडज’ तेहक, दोनिम दोहस रिडतो, ‘किह दोह देन विशवास छुह मा लानगे।’ ³²आए अगर किशा लोनमा मिहतु बिलडज तेहक, दोनिम मिहतु भयाड तोह, छुलोनमा चइ नेचगा तिश युहन्ना सोचक्योहि भविष्यवक्ता तेहक। ³³दोनिम दोगोस यीशु पड जबाब रानगयाश, “निह मा नेचगा तनमा।” यीशुस दोगोतु लोइक्यो, “गह ली किनजु मा रिडग जुह कामड गह हातु होकिस लानजया तुक।”

यीशुस पारशीयो लोनमो

दोनिम यीशुस दोगोतु पारशीयो बातड सोमझयाज तेहक्यो:
12 “इद मिहस दाखडहु बगीचा शेक्यो आए फिरकोट बारयागयो, दोनिम दाखडहु रसु ताइएस इद पान्नु देन खारड बन्यागयो आए इद शेनड बन्यागयो दोनिम दोह पड कामड लानजगा मिहतु गारडस रानरान परदेस ब्योक्यो। ²दोनिम फोसल पाकेनमोगु बेरड आनु हिस्सा ऊनमो जड मालिकिस कामड लानजगा मिह दवा

आनु इद सेवकू शेक्यो, ³दोनिम दोगोस दोह पड चुमचुम कुलगयाश आए शागी गोद वापस शेक्याश। ⁴दोनिम मालिकिस हाइद सेवकू दोगोह दवा शेक्यो, दोगोस दोह बाल्ल खुसक्याश आए दोह बेजित लानगयाश। ⁵दोनिम मालिकिस आइदु जड शेक्यो, दोगोस दोह पड साइक्याश। दोनिम मालिकिस आए मुलूक सेवकोतु शेक्यो, दोगोतु माजो आधडतु दोगोस कुलगयाश आए आधडतु साइक्याश। ⁶हाति मालिकु प्यारा छाड रूगयो, ऐब्बे दोह इदही बोच्चे तेक्यो। आखरी वक्तो दोहस आनु छाडहु ली दोगोह दवा होज्जय सुनच्याशीस शेक्यो। दोगोह आड छाडहु इज्जत लानताश। ⁷दोनिम कामड लानजगास राया लानगयाश, 'जुहीता होकदार तोह, जइ किशा जुह जड सानमे, दोहच होक किशो हाच्यो' ⁸दोनिम कामड लानजगास दोह छाडहु जड चुमचुम साइक्याश आए दाखडहु बगीचो बेरिड फिक्यागयाश ⁹यीशु ऐक्यो, 'जुह दोडज दाखडहु बगीचो मालिक छौग दाहतो? मालिक बहबह दोगोह कामड लानजगातु खत्म लानतो आए दाखडहु बगीचा हाइदेतु रानतो।

¹⁰'किह छौग चोकोस शास्त्रो जुह बोचन मा हुशीगेया हाती रागु जड राजो मिस्त्रिगास निक्मा लोहलोह रुमोगा, होदोइ पौह राग हाचिगयो ¹¹जुह प्रभु बिलडज हाचिज आए किशो नजरोपो बिशारेनमोग तोह!' ¹²दोनिम दोगोह यीशु पड चुम्मो गयाया तेक्याश, छुलोनमा दोगोह सोमझेक्याश यीशुस निड खिलाफ जुह पारशी रिड-रिड रूह, पर दोगोह मिहतु दोक्च बयाडक्याश आए दोह जड शोठ्ठयाया ब्योक्याश।

यीशु दोक्च करु बारे ऐहमो

¹³दोनिम इदेस यीशु पड बातडहापो फोसयामो ताइएस, फरीसीगा रड हेरोदिगातु दोह दवा शेक्याश ¹⁴दोगोस बहबह दोह दोक्च



मुलू सिक्का (12:13)

ऐक्याश, “हे गुरु जी, निड पता रुमा काह सोच्चा तन आए हातुइ परवा मा लान ज्या तन, छुलोनमा काह मिहतु हैसियत खिहखिह मा बातेसच्या तन, पर मिहतु ताइएस परमेश्वरु छौंगिड इच्छा रुह दोह बारे शिक्षा सच्चाई लोच्या तन, पर कैसरु^s लगान रानमो ठीक तोह या माय? निह रानमा या मा रानमा?” ¹⁵यीशुस दोगोतु छल लानो रुश नेहनेह दोगोतु लोइक्यो, “आडजु छुह पोरखयाजो रूड? इद मुलू सिक्का आड दवा कइ, गह दोह जड खिमो रूग।” ¹⁶दोगोस सिक्का करगयाश आए दोहस दोगोतु लोइक्यो, “जुह छाप रड नामड हातु तोह?” दोगोस लोइक्याश, “कैसरु तोह।” ¹⁷यीशुस दोगोतु लोइक्यो, “छौंगिड कैसरु तोह होदोह कैसरु रानी, आए छौंगिड परमेश्वरु तोह होदोह परमेश्वरु रानी।” दोनिम दोगोह दोह बातडहु देनज मुलूक बिशारेक्याश।

शिमा निम हेस्स डेयड पोरेनमो बारे लोनमो

¹⁸दोनिम सदुकिगा ली, हातेइ लोशीज तेक्याश शिजा मिहतु हेस्स न्यूग डेयड मा पोरेत, यीशु दवा बहबह दोह दोक्च ऐक्याश, ¹⁹“गुरु जी, मुसास निड ताइएस चेहचेह रुह, अगर हातु बाज छाडहा पैदा मा लानलान शिमा, आए दोह दोरजे शड निमा, दोनिम दोह भाजीस दोह दोरजे रड शादी लानलान आनु आतेओ ताइएस वंश बढयाज गया। ²⁰स्तीश बाजा तेक्याश। चइकेपोज तेग बाज शादी लानमो निम छाड पैदा मा लानलान शिगयो ²¹दोनिम हाइद भाजीस दोह

^s 12:14 सम्राट

दोरजे रड शादी लानगयो दोहली छाड पैदा मा लानलान शिगयो, आए होदेइ हाइदू दोडज स्या भाजीस ली लानगयो। ²²आए स्तीश भाजा दोक्ची छाड मा हाचिगयो। दोनिम दोह छेचमि ली शिगयो। ²³तेबेरोइ चइ शिजा मिहतु न्यूग डेयड पोरेतो दोह दयार दोह छेचमि दोगोह स्तीश बाजातु माजो हातु नार हाच्यो? छुलोनमा दोह स्तीश बाजातु नार हाचिस तेहक?" ²⁴यीशु दोगोतु लोइक्यो, "नता किह चोकोस शास्त्र पड नेचगा तइ आए ना परमेश्वरु सोतिडहु नेचगा तइ? पक्का, किह होज्जु ताइएस ओम्म पीशिस तइ। ²⁵छुलोनमा तेबेरोइ दोगोह शिजातु माजो हेस्स शड हाचिस दोनिम दोगोस शादी मा लानश आए शादीगा ली मा हाचिस, दोनिम दोगोह स्वर्गो परमेश्वरु दूतो गान नितिश। ²⁶शिजापोज शडमोगु बारेओ किह छौग मुस्सो किताबो झाटडहु कोथ्यो जुह मा हुशीगेया। परमेश्वरीस दोह जड लोनमोग, 'गह अब्राहमु परमेश्वर, इसहाकु परमेश्वर आए याकूबु परमेश्वर तुक?' ²⁷आए दोगोह शिमो निम ली शडग तिश, परमेश्वर शड निजगातु परमेश्वर तोह, शिजातु मानी। होज्जु नुस किह मुलूक तेग गलती लानो रुइ।

चइकेपोज तेग आज्ञा

²⁸दोनिम इद धर्म शास्त्री बइक्यो आए दोगोतु बहस लानज थासक्यो, दोनिम होज्जय नेहनेह यीशुस दोगोतु हाल्ला ठीक जबाब रानमोग, दोहस यीशु दोक्च ऐक्यो, "चइकेपोज तेग आज्ञा छौग तोह?" ²⁹यीशुस दोह जड जबाब रानगयो, "चइ हुकुमोतु माजिड होज्जु बातड तेग तोह: 'हे इस्राएल थास! किशो प्रभु परमेश्वर सिर्फ इदही प्रभु तोह। ³⁰आए काह प्रभु कान परमेश्वर रड कान चइ मोनडस, आए कान चइ प्राण, रड कान चइ समझ रड आए कान चइ ताकत रड बेन्नड ताहराह।' ³¹आए हाइद होज्जय तोह, 'काह

कान पडोसी रड आनु गान बेन्नड ताहराह, जुगोज तेग आए छची आज्ञा माय। ³²शास्त्री दोह पड लोइक्यो, “हे गुरु, काह ठीक रिडगिन! काह सोच रिडगिन, प्रभु परमेश्वर सिर्फ इदही तोह, परमेश्वरु छारयाया आए हाति मायश ³³आए दोह रड चड मोनड रड आए चड समझ, रड आए चड ताकत रड बेन्नड ताहरे’, आए पडोसी रड आनु गान बेन्नड ताहमो, चड होमबलि” रड बलिदानोपोज बढ्ढेह तोह। ³⁴तेबेरोइ यीशुस ताडगयो, दोहस सोमझेझे ठीक उतर केक, दोनिम दोह पड लोइक्यो, “काह परमेश्वरु राजोज वारको मायन।” आए हातुइ हेस्स दोह दोक्च छची सवाल ऐहमो हिम्मत मा देगयो।

मसीह हातु छाड तोह?

³⁵यीशुस मन्दिरो उपदेश रानबेरो, दोगोतु ऐक्यो, धर्म शास्त्र नेचगा हाल्ला रिडजगा तिश, मसीह दाऊदु वंशोज तोह? ³⁶दाऊदिस आनीस चोकोस आत्मो बडबड रिडरिड रूह:

‘परमेश्वरस आड प्रभु’ पड लोनमोग: आड जाखडहो तोश, तेरड स्तड गह कान दुशमनोतु कान बाडहातु छड मा करग।’
³⁷दाऊदिस ताह आनीस मसीह पड प्रभु लोच्या तोह, दोनिम मसीह दाऊदु छाड हामच हाचिग? आए भीडू मिहस दोह बातडहा खुशिश रेनचो तेक्याश।

शास्त्रीगातु दोक्च सावधान

³⁸दोहस आनु उपदेशो दोगोतु लोइक्यो, “धर्मशास्त्रीगा दोक्च चौकस निहरे। दोगोह आनेतु डेयडहो लाम्बा-लाम्बा गास्सा गाजिस

¹ 12:33 इदेह शास्त्रोपो प्राण ली चेशीज तोह।

² 12:33 होमबलियो बलि लानशिज पशु पड पुरो पोकचगा तेक्याश।

³ 12:36 यीशु मसीह

हालेनमो पंसद लानजगा तिश आए बाजारोपोस दोगोतु नमस्ते लोनमा दाम चालजगा तिश ³⁹आए आराधनालयो दाम-दाम जागोह तोशीमो रड खाऊ जामो बेरड ली ओभोल जागाह गयाचगा तिश ⁴⁰दोगोह रांडोलेतु धोखा रानजगा तिश किमातु लुटयाजगा तिश, आए दोगोतु जाडमो जड मुलूक देर स्तड प्रार्थना लानो निजगा तिश, जुगोतु मुलूक सजा पोरेतो।

गरीब रांड छेचमिऊ दान

⁴¹यीशु मन्दिरो दानु पेटिऊ ओमस्को तोशीस खियो तेक्यो, मिहस दानु पेटियो तोह-तोह रुपया शेदो रुश, मुलूक अमीरो मिगास मुलूक रुपया शेक्याश। ⁴²जुनिम इद रांड छेचमि बडक्यो, दोहस निश त्रोमडहु सिक्कगा शेक्यो, निश त्रोमडहु सिक्कगा इद रुपयो बराबर ली मायक्याश ⁴³दोनिम यीशुस आनु चेलगातु आरयाया, दोगोतु लोडक्यो, “गह किनजु सोच रिडहो रुग, मन्दिरो दानु पेटियो शेचगा मिहतु माजो, जुह गरीब रांड छेचमि चडकेपोज बोदी शेनमोग; ⁴⁴छुलोनमा, चडकेस आनु बोदी रुपयातु माजो दान शेनमोगा, पर जुहस आनु दवा कम रुपया निहनिह ली छौगिड दोह दवा रुमोग, आनु चड कमाइ शेहशेह रुह।

मन्दिरु नाश हाचिमोगु बारे लोनमो

13 तेबेरोइ यीशु मन्दिरोज बेरिड दोहच तेक्यो, देबेरो दोह चेलगातु माजो इद चेलास दोह जड लोडक्यो, “हे गुरु जी, खिऊ, हाल्ला तेगे रागा रड हालिस शारे भवनो तिश!” ²यीशुस लोडक्यो, “काह नूह तेगे भवनोतु खियो रुना: होजोर इद रागु देन हाइद राग ली टिकेके मानी, इद-इद रागातु जड फरालताश।”

मुसीबत रड दुखड

³तेबेरो यीशु जैतूनु डोखडहु देन मन्दिरु ओमस्को तोशीस तेक्यो, दोनिम पतरस, याकूब, युहन्ना रड अन्द्रियासीस यायी ब्योब्यो, दोह दोक्च ऐक्याश, ⁴“निडजु जड रिड जुह चड बातडहा तेबेरो बीतेतिश? आए तेबेरोइ जुह चड बातडहा बितेनमो नितिश, दोह वक्तो छौग निशान निहतोह?” ⁵यीशुस दोगोतु लोच तेक्यो, “चौकोस नीह, हाइसी किनजु मा बेक्याजिज गया। ⁶मुलुक मिगास आड नामडस बहबह रिडतिश, ‘गह होदोइ तुक!’ आए मुलूक मिगातु बहक्याताश ⁷तेबेरोइ किह लडाइगा रड, लडाइगा हाचिमो बारे बातडहा थासतइ, देबेरो थाह भयाडरे, छुलोनमा जुह चड पक्का हाचिस, पर दोह वक्तो खत्म मा हाच। ⁸इद जातिश हाइद जातिऊ देन, इद राज्य हाइद राज्य खिलाफ हाचिस कुलिशस, चड जागगापो जुडगू बतो आए अकाल बतो, पर जुह चेल्लो हाचिमोगु ओमस दुखडहु शुरूवात गान नितोह। ⁹“पर किह किन बारेओ चौकोस निह, छुलोनमा मिहस किनजु गिरफ्तार लानचिस रड कोट्टो फ्योचिस, आए आराधनालयगापो किनजु कुलचिस आए किनजु आड ताइएस नेतगा रड राजगातु ओमस्को डेन लानचिस, छुलोनमा आड वजेस दोगोतु सुसमाचार सुनयाज गयाइ। ¹⁰पर खत्म हाचिमोगो ओमस, सुसमाचार चड मिहतु प्रचार लानमो जरूरी तोह। ¹¹तेबेरी दोगोस किनजु चुमचिस कोट्टो फ्योचिस, दोगोतु हवाले लानचिस। देबेरो किह ओम्मसी चिन्ता थाह लानरे, किशा छौग लोहते, दोह वक्तो छौगिड किनजु रिडतो होदोइ लोहरे, छुलोनमा देबेरो बातेसच्या किह मानी, किन कुमो चौकोस आत्मा तोह। ¹²भाजीस भाजु जड, बाबास छाडहु जड सानमो शेताश आए छाडहास आनु आम्मा रड बाबो खिलाफ हाचिस, दोगोतु

सानमो शेताश। ¹³आए आड नामडहु ताइएस चइ मिहस किन रड दुशमनी लानताश, पर दोहली हाति जिन्दगी खत्म हाचिस स्तड बोन्नेने नितोह, दोह उध्दार हाचो।

मुलुक मुसीबतोतु वक्त

¹⁴दोनिम किह तेबेरोइ दोह खत्म लानिचमोग चीजु हामिड दोह मा निमो गयाच, होदोर डेन ताडतई, (हुशिजगा सोमझेरे) देबेरो हातेइ मिह यहूदियो नितिश, दोगोह डोखडहु देन ब्योरे। ¹⁵हातेइ मिह आनु किमु छापरडहे नितिश, दोगोह योग जाबजाब, छौंग चीज करमो ताइएस किमु कुम्मो ब्योब्यो, वक्त बर्बाद थाह लानरे; ¹⁶आए हातेइ बेरिड रिमापोस नितिश, दोगोह आनु कापरा करमो ताइएस निमस्को थाह ब्योरे ¹⁷दोह छेचातु ताइएस हातेइ छाडहा ताजगा नितिश आए हातेतुइ खेरड तुडजगा छाडहा नितिश, दोगोतु ताइएस मुलूक दुखडसगा दयारो नितिश। ¹⁸प्रार्थना लानी जुह चइ गुण दयारो मा हाचिज गया। ¹⁹दोह दयारोपो होजेस दखुडहा बतिश, जुह संसारु शरुवातोज, हातुइ परमेश्वरीस बन्याया रुह, तोरोस स्तड नाता हाचिग आए नता हेस्स हाचो। ²⁰पर परमेश्वरस आनु बिन्याशिजातु ताइएस, दोह दयारोतु कम लानलान रुह, अगर मा लानलान निमा, हाति मिह मा बोचेचा, ²¹दोह दयारोपो हाइसी किनजु रिडमा, 'खिह, मसीह होज्जा तोह', या 'खिह, होदाह तोह', देबेरो दोगोतु विशवास थाह लानरे; ²²छुलोनमा जाली मसीह रड जाली भविष्यवक्तगा ताडमो बतिश आए निशानो रड बान्ते सोतिडहु कामडहा बिन्याशिजातु बेक्यामो जाडचिस, अगर लानमो थानमा। ²³दोहली किह चौकोस निह; खिह, गह किनजु चइ बातडहातु दोह वक्त बनमोगु ओमसी रिडरिड रुग।

मिहऊ छाडहु हेस्स बनमो

²⁴दोह दयारोपो दोह मुसीबतु वक्तु निम वेन अंधेरा हाच्यो आए गोलसडस छाग माके ²⁵आए सोरगडज स्कारा दानमो शुरु लानताश आए सोरगडहु सोतिडहातु चुक्याताश। ²⁶दोनिम मिहस, मिह छाडहु जड मुलूक सोतिड रड आए महिमा रड दुडुडहो बच ताडताश। ²⁷दोह वक्तो दोहस आनु दूतोतु शेहशेह, धरतीऊ जुह किनारे, सोरगडहु दोह किनारे स्तड, चइ दिशोज आनु बिन्याशिजा मिहतु राशड लानतो।

तिरमोलु बोठडहु उदाहरण

²⁸तिरमोलु बोठडहु दोकच जुह बातडहु मतलब सोमझेइ: तेबेरोइ दोह डालड नरम हाचिज्या निहतोह आए न्यूगे पाचडहा दोनमो शुरु लानताश दोनिम किह नेचगा तइ किह गरिमगातु दयारो बनमो रुश। ²⁹होजेइ तेबेरोइ किह जुह बातडहातु बीतेच ताडतई, दोहच सोमझेरे, दोह वक्त, ओशको बहबह तोह, आए शुरु हाचिमो रुह। ³⁰गह किनजु सोच रिडहो रुग तेबेर स्तडही जुह चइ बातडहा मा बितेश, दोह स्तड जुह मिह मा शिश ³¹सोरगड रड धरती खत्म हाचिस दोहली आड बातडहा चोंगे खत्म मा हाचिस

खियो निह आए चौकोस निह

³²दोह दयार रड दोह वक्तु बारेओ हाती मा नेच्या तोह, नता स्वर्गू दूत, ना छाडहिस, पर सिर्फ बाबास नेच्या तोह। ³³थासी, खियो निह आए चौकस निह, छुलोनमा किह मा नेचगा तइ, दोह वक्त तेबेर बच्या तोह। ³⁴होज्जु दोह मिहु हालत देस तोह, हाति परदेस ब्योमो बेरड आनु किम छारयाया ब्योतो आए आनु नौकरोतु होक रानतो, आए चइकेतु आनु-आनु जिम्मेदारी

रानतो आए दवारपालु खियो निमो हुकुम रानतो। ³⁵आए होज्जु ताइएस खियो निह, छुलोनमा किह मा नेचगा तइ, किमु मालिक तेबेरो बच्या तोह, शुपेलिड बतो या माजरा रातिड या कुखरस बाशनमो वक्तो या सोम। ³⁶होज्जय मा हाचिज गया, दोहस अचानक बहबह, किनजु याक्शीस ताडचिज गया। ³⁷आए छौगिड गह किनजु रिडहो रुग, होदेइ गह चइकेतु लोदो रुग: खियो निह!”

यीशु खिलाफ साजिस

14 निश दयारु निम फसह^w रड अखमीरी^x रोटेतु खोदिड बच्या तेक्यो, प्रधान याजको रड शास्त्रीगा जुह बाना पोचिज तेक्याश, किह दोह पड हाल्ला धोखास चुमचुम सानमे। ²दोनिम दोगोह लोशीज तेक्याश, खोदिडहु दयारोपो मानी, हाम होज्जय मा हाचिज गया, मिहस छौगता मुसीबत खडा लानमा।



संगमरमरु बानिहो जटा
मासिऊ ईत्र (14:03)

बैतनियो यीशु बाल्ले इत्र ओसमो

³तेबेरोइ यीशु बैतनियो शमौन हातुइ कोढ रुमोग, दोह किमो खाऊ ज़ामो तोशीस तेक्यो, देबेरो इद छेचमिहस संगमरमरु बानिहो जटा मासिऊ, शुध्द मुलूक किमती ईत्र लिगशीस बइक्यो; आए बानिड चगचग

^w 14:1 जुह इब्रानीगातु खोदिड तोह,

^x 14:1 जुह यहूदिगातु खोदिड तोह, जुह दयारोपो दोगोस बगेर खमीरु स्कशिज रोटे जाजगा तेक्याश।

ईत्र दोह बाल्ले ओसक्यो। ⁴जुह दोडज होदाह हातेदह मिहस चिडडेह लोशीगयाश, “जुह इत्र छुह बर्बाद लानगे? ⁵छुलोनमा जुह इत्र शुमराह मुलू सिक्कगापोज” बोदी किमतो रेशीजद आए दोह सिक्कगा गरीबोतु कागमा दाम तेहक” आए दोगोस दोह पड डाँटयामो देगयाश। ⁶यीशुस लोडक्यो, “दोह पड निमशेड; दोह छुह परेशान लानो रुड? दोहस्ता आड रड भला लानमोग। ⁷गरिबो किन रड सौदाइ निजगा तिश, आए किह तेरडहि गयातइ, देरड दोगोतु भला लानमो थानतइ, पर गह किन रड सौदाइ मानिग। ⁸छुगिड दोहस लानमो थानमोग, दोहस लानमोग, दोहस आड आडयाजिमोगु तैयारिऊ ओमची, आड डेयड इत्र शेहशेह लानमोग ⁹गह किनजु सोच रिडहो रुग, चइ संसारो हामिड सुसमाचार प्रचार हाच्यो, होदोर दोह कामडहू चर्चा, दोह याद ताहमो लानताशो।”

यहूदो विश्वासघात

¹⁰दोनिम यहूदा इस्कुरियोती हाति सोनिश चेलगातु माजो, इद तेक्यो, प्रधान याजको दवा बडक्यो, छुलोनमा यीशु पड दोगोतु गोदोह चुम शेनमो जड। ¹¹दोगोह जुह बातड थासथास मुलूक खुश हाचिगयाश आए दोगोस दोह पड रुपया रानमो वादा लानगयाश, दोनिमज निम यहूदा यीशु पड धोखास चुम शेनमो ताको तेक्यो।

चेलगा रड फसह खोदिडहु आखरी भोज ज़ामो

¹²बटुरु मा ज़ामोग खोदिडहु पहला दयारो, दोगोस फसह खाच्यु बलि रानजगा तेक्याश, यीशु चेलगास यीशु पड ऐक्याश, “काह हाम गयाच्या तन, निह व्योव्यो कान ताइएस फसह ज़ामो जड

⁹ 14:5 शुम राह दिनार इद बोर्षडहु दयारियोज ली बोदि तेक्यो।

तैयारी लानमा?” ¹³यीशुस आनु चेलगातु माजो निशतु होज्जय लोहलोह शेक्यो, “नगरो ब्याही, आए इद मिह तिहसे घोर थोहथोह किसीऊ पोरेतो, दोह निमस्कोज ब्योराच; ¹⁴आए दोह मिह हाति किमो ब्योतो, दोह किमु मालिकु जड लोहराच, ‘गुरु जी रिडहो रुह, दोह कोमरा हाम रुन, हामिडहि गह आड चेलगा रड फसह भोज ज़ामो रुग। ¹⁵दोहस किसीऊ इद सोज्याशि, तैयार लानशीज थोग तेग कोमरा जाडचो, होदाइ निड ताइएस तैयारी लानी।” ¹⁶दोह निश चेलगा दहदह नगरो बड्क्याश, यीशुस दोहसडहु जड हालिड लोहलोह रुगयो, होदेइ पोरेक्यो, दोनिम फसह तैयार लान गयाश ¹⁷शुपेलिड हाचिमो निम, यीशु सोनिश चेलगा रड बड्क्यो। ¹⁸तेबेरोइ दोगोह तोशीस खाऊ जोह तेक्याश, “देबेरो यीशुस दोगोतु लोइक्यो, गह किनजु जड सोच रिडहो रुग, किन माजिडज इद, हाइसी आड रड खाऊ जोह रुह, आड जुह चुमचिमो शेहतो।” ¹⁹दोनिम दोगोस दुखी हाचिस, इद-इद यीशु पड ऐक्यो, दोह गह तुका ²⁰यीशुस दोगोतु लोइक्यो, “दोह किन सोनिश चेलगातु माजो इद तोह, हातिसी आड रड कोलिचो गोद शेदो रुह। ²¹छुलोनमा मिहऊ छाडहु ताह, हाल्लाहि दोह बारेओ चेशीज तोह, होदेइ शिमो रुह, दोहली दोह मिह पड हाय! हातुइ दोक्च मिहऊ छाड चुमशो, अगर दोह मिहऊ जोरमड मा हाच्चिस निमा, दोह ताइएस भला निजद”

प्रभु भोज ज़ामो

²²तेबेरोइ दोगोस प्रभु-भोज जोह तेक्याश, यीशुस रोट थोगयो, दोनिम धन्यावादु प्रार्थना लानलान खानया गयो, आए दोगोतु रानगयो, आए लोइक्यो, ओईई, जुह आड डेयड रुग।” ²³दोनिम यीशुस कोलिच थोहथोह धन्यावाद रानगयो, आए दोगोतु रानगयो; आए दोगोह चड कोलिचो ज तुडगयाश ²⁴आए यीशुस चेलगातु

लोइक्यो, “आड जुह खुन परमेश्वर
 न्यूग इकरारनामा पड पक्का लानचया
 तोह, हाति मुलूकु ताइएस ब्योह रुग,
²⁵गह किनजु जड सोच रिडहो रुग,
 दोह दयार स्तड शुध्दुडहु जड, हेस्स
 चोंगे मा तुडग, तेरड स्तड परमेश्वर
 राज न्यूग मा तुडग।” ²⁶दोनिम दोगोह
 भजन लानलान बेरिड जैतूनु डोखडहो
 ब्योक्याश।



दाखडहू रस तोनमोग
 जागाह (14:25)

पतरसु मुकरेनमो बारे भविष्यवाणी

²⁷दोनिम यीशुस दोगोतु लोइक्यो, “किह चड विश्वासोज भटक्याशइ
 आए आड शोट्टयाजइ, छुलोनमा चेशीज तोह: ‘परमेश्वरस पालसु
 सातोह आए चड जेह छितर-कितर हाचिस।’ ²⁸दोनिम परमेश्वरस
 आड शडग लानचिमो निम, गह किनोज ओमस गलीलु जड
 ब्योतुक।” ²⁹पतरसीस दोह पड लोइक्यो, “चाए चड शोट्टयाजिमा, पर
 गह कानजु चोंगे मा शोट्टयाजुक।” ³⁰यीशुस दोह जड लोइक्यो, “गह
 कानजु सोच रिडहो रुग तोरोइ हुजुइ रातिड काह निश बार कुखरस
 बाशनमोगु ओमस, काह शुम जब आड मा शेचया तुक लोतन।”
³¹जुह बातडहु देनज पतरसीस आए ली जोर-जोरीस लोइक्यो, “अगर
 आडजु जड कान रड शिमो ली खाम्मा, दोहली गह कान मा शेचया
 तुक मा लोक।” आए होज्जेइ चड चेलगास ली लोइक्याश।

गतसमनी जागोह प्रार्थना

³²दोनिम दोगोह गतसनी लोनमोग इद जागोह बइक्याश आए
 दोहस आनु चेलगातु लोइक्यो, “होज्जा तोशीस निह, तेरड स्तड

गह प्रार्थना लानताक। ³³आए दोहस पतरस, याकूब रड युहन्ना पड आनु रड फ्योक्यो, आए मुलूक दुखी रड चिंतित हाच्यो तेक्यो, ³⁴आए दोहस लोडक्यो, “आड मोनड मुलूक दुखी तोह, होनो तोह, गह शिमो दोडस्तड तुक, किह होज्जा निह, आए ज़ोन निह।” ³⁵दोनिम दोह दोक ओमस्को ब्योक्यो, आए माटिडहु देन बराल बराल प्रार्थना लानमो देगयो, अगर लानमो थानमा, जुह दुखड वक्त आड देन मा बितेच गया ³⁶आए लोडक्यो, “हे पापा, हे अब्बा, कान ताइएस ताह चड मुमकिन तोह; जुह दुखडहु कोलियु आड दोकच वारको लान, दोहली गह हाल्लिड गयाच्या तुक, होदेह मानी, पर हाल्लिड काह गयाच्या तन, होदेइ लान।” ³⁷दोनिम दोह बडक्यो आए दोगोतु याकशीज ताडताड पतरसु लोडक्यो, “हे शमौन, काह याकशो रुना, काह छौग इद घंटा ली ज़ोन निमो मानगीना?” ³⁸आए दोहस लोडक्यो, “खियो निह, आए प्रार्थना लानो निह, छुलोनमा किह परीक्षो मा बयोच गयाइ! मोनड ताह तैयार तोह, पर डेयड कमजोर तोह। ³⁹दोनिम दोह हेस्स ब्योक्यो, आए होदोइ बातडपो प्रार्थना लानगयो। ⁴⁰आए हेस्स बनमो निम, दोगोतु यागशीस ताडगयो, छुलोनमा दोगोतु मिगापो निदरड बहबह तेक्यो, आए दोगोतु छची सोमोझ मा देगयो, दोह जड छौग जबाब रानमा। ⁴¹दोनिम हेस्स शुम जबचु बारो बहबह दोगोतु लोडक्यो, “ऐब्वे याकेशो निह आए आराम लानी? बस! दोह घंटा बडक! खिह, ऐब्वे मिहऊ छाड पापिगातु गोदोह चुमशो। ⁴²सारशी, पड! खिह, आड चुमचिम शेचिज्या मिह होज्जा बहबह तोह!”

यीशु पड धोखास चुम शेनमो

⁴³यीशुस होज्जय लोदोइ तेक्यो, देबेरोइ यहूदा हाति सोनिश चेलगातु माजो इद तेक्यो, दोहस आनु रड शोठ्ठगा रड तलवारो

लिंगशीस इद भीडू करगयो, आए दोगोतु प्रधान याजको, शास्त्रीगा रड स्योनोस शेहशेह रुगयाश। ⁴⁴दोह चुम्मो शेचयास होज्जय इशारा रानरान रुगयो, हातुइ गह पोपिच रानताक, होदोइ तोह, दोह चुमचुम चौकोसीस फ्योरे। ⁴⁵दोह बइक्यो आए फटक दोह दवा बहबह लोइक्यो, हे गुरु जी, आए दोह जड पोपिच रानगयो। ⁴⁶दोनिम दोगोस दोह गोद चुमचुम दोह पड चुमगयाश ⁴⁷दोगोतु माजो हातेइ दवा डेन तेक्यो, इदीस आनु तलवार तोहतोह महा याजकु दासु देन चल्यागयो, आए दोह कानड तोइक्यो। ⁴⁸दोनिम यीशु दोगोतु लोइक्यो, “किह आडजु जड डाकू चालचिस तलवारो रड शोठोगा लिंगशीस चुमचिम ताइएस बहबह तइया? ⁴⁹गहता दयारो मन्दिरो किन रड निहनिह उपदेश रानो तेकिक, आए देबेरो किह आडजु जड छुह मा चुमचिगे, पर होज्जय होज्जु नुस हाचिग, ताकि चोकोस शास्त्ररु बातड पूरोह हाचिज गया। ⁵⁰दोनिम जुह दोडज चइ चेलगास दोह जड छारयाया भागया शिगयाश। ⁵¹इद जवान आनु सालगी डेयडहो चादर फोगशीस, दोह निमस्कोज हाचिगयो आए मिहस दोह पड चुमगयाश। ⁵²पर दोह चादर छारयाया सालगी भागेक्यो।

महासभो ओमस्को यीशु

⁵³दोनिम दोगोस यीशु पड महायाजकु किमो फ्योक्याश, आए चइ प्रधान याजको, शास्त्रीगा आए स्यानो दोह दवा जामशीगयाश ⁵⁴पतरस वारको-वारको नियो, दोह निमस-निमस महायाजकु खातडहोस स्तड कुमो बइक्यो आए होदाह मन्दिरु रुमजगा रड तोशीस, मेह पालशिज तेक्यो। ⁵⁵प्रधान याजको रड चइ यहूदी महासभा यीशु पड सानमो ताइएस, दोह खिलाफ शादतो पोचिज तेक्याश, पर दोगोतु हाति मा पोरेक्यो ⁵⁶मुलुक मिहस दोह खिलाफ


जाली गवाही रानगयाश, पर दोगोतु बातड इद ली आनेतु कुमो मा रुक शीज्या तेक्यो। ⁵⁷दोनिम इदे मिहस सारशीस, दोह खिलाफ जाली गवाही रानगयाश, ⁵⁸“निह जु जड होज्जय जहज थास्सकिमा, गह जुह मिहतु गोपोज बन्याशीज मन्दिरु फरालताश, आए शुम दयारु कुमो हाइद बन्याताक, हाति गोदिस मा बोन्याशिज तोह।” ⁵⁹जुह बातड देन ली दोगोतु गवाही मा रुकशो तेक्याश ⁶⁰दोनिम महायाजकिस माजिडहोज डेन हाचिस यीशु पड ऐक्यो, “काह छुह छची जबाब माक्यो रुन? जुह मिहस कान खिलाफ छौग गवाही क्यो रुश?” ⁶¹दोहली यीशु चुट्ट तेक्यो, आए छची जबाब मा रानगयो। महा याजकिस दोह जड हेस्स ऐक्यो, “काह छौग दोह परम धन्य परमेश्वरु छाड मसीह तना?” ⁶²यीशुस लोइक्यो, “गह तुक: आए किह मिहऊ छाडहु जड चेइकेपोज बोदी सोतिड स्या परमेश्वरु जाखड बिलड तोशीस, आए सोरगडहु दुइड रड बच ताडतई।” ⁶³दोनिम महा याजकिस आनु गास्स चरचर लोइक्यो, “ऐब्बे किशो गवाहीगातु आए छौग जरुरत तोह?” ⁶⁴किह जुह परमेश्वरु निन्दो बातड थास्के, किन छौग सलाह रुइ? दोगोह चइकेस लोइक्याश, जुह मौतु सजो काबिल तोह ⁶⁵दोनिम इदे मिहस दोह देन थुक्या गयाश, आए इदेस दोह स्थो छिहछिह, आए दोह जड मुठुगास ठिसो आए दोह जड लोनमो देगयाश, “ऐब्बे रिड हाइस कुलचिग!” बितेनमोग बातडहा रिड आए दोनिम मन्दिर रुमजगास दोह जड चुमचुम कुलगयाश।

पतरसु मुकरेनमो बारे

⁶⁶तेबेरोइ पतरस योग खातडहो तेक्यो, देबेरो महायाजकु दासीगातु माजो इद दासी होदाह बइक्यो। ⁶⁷आए पतरसु मेह पालशिज ताडताड दोह पड ओभोल खिहखिह शेशक्यो, आए लोइक्यो,

“कालिताह दोह नासरी यीशु रड तेकिन।” ⁶⁸दोह मुकरेक्यो, आए लोइक्यो, “गह नता नेच्या तुक, आए ना ही सोमझे दोह रुग, काह छौग रिडहो रुन।” दोनिम दोह बेरिड डेलड दोड ब्योक्यो; आए कुखरस बाशेक्यो। ⁶⁹दोह दासीस दोह जड ताडताड, हातेइ दवा डेन तेक्याश, हेस्स लोनमो देगयो, “जुह दोगोतु माजिडज इद तोह।” ⁷⁰दोनिम दोह हेस्स मुकरेक्यो, दोक देरु निम दोगोह मिहस हातेइ होदाह डेन तेक्याश, हेस्स पतरसु जड लोइक्याश, “पक्का काह ली दोगोतु माजो इद तन; छुलोनमा काह गलीललोज तन। ⁷¹दोनिम पतरसीस लोइक्यो, गह कसम जोह रुग आए किनजु सोच रिडहो रुग! गह दोह मिह पड, हातुइ बारेओ किह रिडहो रुइ, मा नेचयातुक, दोनमा परमेश्वरस आडजु सजा केहच गया, ⁷²दोनिम फटक हाइजब ली कुखरस बाशेक्यो। पतरसु दोह बातड छगिड यीशुस दोह जड लोहलोह रुमोग, याद देगयो: “कुखरस निश बार बाशेनमोज ओमस काह शुम जब आड इंकार लानतन।” आए पतरस जुह बातड सुनचेचे क्राम्मो देगयो

पिलातुसु ओमस्को यीशु



नगरु बेरिड डोखडहु देन क्रूसो
शेनमोग जगाह (15:0)

सोम साड रातिड फटक प्रधान
15 याजको, शास्त्रीगा रड स्यानोस,
आए चइ महासभास सलाह लानलान,
दोनिम यीशु पड छुइक्याश, आए यीशु
पड फयोफयो पिलातुसु हवाले रान
गयाश। ²पिलातुसीस यीशु पड ऐक्यो,
“काह छौग यहूदीगातु राजा तना?”
यीशुस लोइक्यो, “काह आनीसी रिडहो
रुन।” ³प्रधान याजकोस दोह देन मुलूक

इल्जाम शेदो तेक्याश ⁴पिलातुसीस दोह जड हेस्स ऐक्यो, काह छौंग छची जबाब मा रानमो रुना, खिरू, जुगोस कान देन तेहक बातडहातु इल्जाम शेदो रुश। ⁵यीशुस दोहली छची जबाब मा रानगयो, होज्जु देनज पिलातुस मुलूक हैरान हाचिगयो

मौतु सजो हुकुम रानमो

⁶पिलातुस फसह खोदिडहो, हालिडहि मिह गयाचगा तेक्याश, दोगोतु ताइएस इद कैदि पड छारयाज्या तेक्यो ⁷हातेसी विद्रोह लानबेरो मिलेले खुन लानलान रुगयाश, दोह वक्तो बरअब्बा नामडस्या इद मिह, विद्रोह लानजगा रड कैद तेक्यो, ⁸दोनिम चइ मिह थोग ब्योब्यो, दोह दोक्च अर्जी लानमो देगयाश,हाल्लाहि काह निड ताइएस लानो बदो रुन, होदेइ लान। ⁹पिलातुसीस दोगोतु ऐक्यो, “किह छौंग गयाचगा तइ, गह किन ताइएस यहूदीगातु राजा पड छारयागाह?” ¹⁰दोहली दोहस नेच्या तेक्यो, प्रधान याजकोस यीशु पड जलन ताडताड चुमचुम करकर रुश। ¹¹दोनिम प्रधान याजकोस मिहतु जड बहक्याया लोनमो शेक्याश, बरअब्बा पड दोगोतु ताइएस छारयो। ¹²होज्जे थासथास पिलातुसीस दोगोतु हेस्स ऐक्यो, “हातुइ किह यहूदीगातु राजा लोचगा तइ, दोह जड गह छौंग ताक?” ¹³दोगोह हेस्स टोकेक्याश, “दोह जड क्रूसु देन शेत!” ¹⁴पिलातुसीस दोगोतु ऐक्यो, “छुह, जुहस छौंग गुनाह लानलान रुह?” दोनिम दोगोह आए ली बोदी टोक्याशी गयाश, “दोह जड क्रूसु देन शेत!” ¹⁵दोनिम पिलातुसीस मिहतु जड खुश लानमो ताइएस, बरअब्बा पड दोगोतु ताइएस छारयागयो आए यीशु पड कोडगास कुलकुल दोगोतु हवाले रानगयो, छुलोनमा क्रूसु देन शेच गयाश।

सिपाईगास यीशु पड पारशी लानमो

¹⁶सिपाईस यीशु पड राज्यपालु किमु कुमो खातडहो फ्योक्याश, आए चड सिपाईगातु पोलटन आरया गयाश। ¹⁷दोनिम दोगोस यीशु पड रोक, शविग आए नीला रंगु गास्स स्कागयाश आए चोहतु ताज बन्याया दोह बाल्ले शेक्याश। ¹⁸आए होज्जय ठाट्टे लोहदोह लोइक्याश, “हे यहूदीगातु राजा, काह सौदाइ निहरा!” ¹⁹दोगोस दोह बाल्लु देन शोठ्ठोस कुलोह तेक्याश, आए दोह देन थुक्यो रड पशबाडहा टेक्याया, यीशु पड नमस्कार लोच तेक्याश। ²⁰तेबेरोइ दोगोह ठाट्टे लानलान यालगयाश, दोनिम दोह डेयडहोज रोक, शविग रड नीला गास्सु टोहटोह, दोही गास्स स्कागयाश आए यीशु पड क्रूसु देन शेनमो ताइएस बेरिड फ्योक्याश।

यीशु पड क्रूसु देन शेनमो

²¹सिकन्दर रड रुफुसु बाबा शमौन, कुरेन गोनिडहो निज तेक्यो, देबेरो दोह गोनिडज बच तेक्यो, आए दोगोह ओम्मो छुगशीगयाश, सिपाईगास दोह जड जरक्याया लोइक्याश, यीशु क्रूसु थोहथोह पाए। ²²दोगोस यीशु पड गुलगुता लोनमोग जागोह करगयाश, हातुइ मतलब तोह खोपडीऊ जागाह। ²³दोनिम दोगोस दोह मुर् नामड स्या दवाई स्कशीज शुध्दुड तुडमो रानगयाश^z, पर दोहस मा तुडगयो,



कर ऊनमो जागाह (15:21)

^z 15:23 आखा वारको लानमो ताइएस दोह दवाई रानजगा तेक्याश।



मुरु बोठड (15:23)


²⁴दोनिम दोगोस दोह पड कूसो शेक्याश, दोह गास्सा दोगोस कागशीगयाश, हातु छोग पोरेतो, होज्जु खिमो ताइएस दोगोस पर्चीगा शेक्याश, ²⁵सोम स्कुइ बाजेजे तेक्यो, तेबेरोइ दोगोस दोह पड कूसु देन शेक्याश ²⁶आए दोह खिलाफ इद तखतो चेगयाश, "यहूदीगातु राजा" ²⁷दोगोस दोह रड निश डकूगातु कूसो शेक्याश, इद दोह जाखड बिलड आए हाइद दोह खोजिड बिलड शेक्याश ²⁸[दोनिम चौकोस शास्त्र दोह बोचन पूरोह हाचिगयो दोह नामड अपराधिगा रड नारशीगयो]^a ²⁹आए ओमोस व्योचगा मिहस बाल्ल चुक्यो-चुक्यो, होज्जय लोहलोह दोह निन्दा लानज तेक्याश, "वाह! काह होदोइ तन, मन्दिरु फरोस फरोस शुम दयारेज हेस्स बन्याज्या। ³⁰ऐब्बे कूसु देनज योग ताह जाब आए आनु जानुता बच्यो।" ³¹आए होज्जयी प्रधान याजको रड शास्त्रीगा ली आनेतु कुमो ठाट्टे लानो लोशीज तेक्याश, "जुस हाइदेतु बच्यामोग पर आनु जड बच्यामो मानमोग। ³²इसाएलु राजा, मसीह, ऐब्ब कूसु देनज योग जाबच गया, निह खिहखिह विश्वास लानज गयामा।" आए हातेइ दोह रड कूसु देन शेहशेह रुमोगा, दोह सड ली दोह निन्दा लानज तेक्याश।

यीशु प्राण छारयामो

³³लाये सोनिश बाज्जे चड देशडहो रातिड हाचिगयो, आए शुम बाज्जे स्तड आन्यारीड तेक्यो। ³⁴शुम बाज्जे यीशुस मुलूक जोरीस टोकेके लोइक्यो, "इलोइ, इलोइ, लमा शबक्तनी?" हातुइ मतलब

^a 15:28 यूनानीयो चेशिद किताबो पोह जुह वचन माय।

तोह, “हे आङ परमेश्वर, हे आङ परमेश्वर, काह आङ्जु छुह शोठ्ठयाजिगीन?” ³⁵हातेइ ओशको डेन तेक्याश, दोगोतु माजो इदेस होज्जय थासथास लोइक्याश, “खिह, दोहस एलिय्याह पङ आरयो रुह।” ³⁶दोनिम इद मिहस ठुहरे दाखडहु सुरग रसु डुब्याशीज स्पंज इद डेगो शेशेह दोह जङ रानगयो आए लोइक्यो, “रुकेइ, खिमेह, नूह योग चाम्मो ताइएस एलिय्याह




बतोह या माबत।”

क्रूसु देन यीशु (15:36)

³⁷दोनिम यीशु जोरीस

टोकेक्यो आए शिगयो। ³⁸मन्दिरो पर्दा थोक्चि योग स्तङ जेरजेर निश टुकरा हाचिगयो। ³⁹हाति सूबेदार दोह ओशको डेन तेक्यो, तेबेरोइ दोह जङ होज्जय टोकेके प्राण छारयाज ताङगयो, दोनिम दोहस

लोइक्यो, “सोच्चि जुह मिह, परमेश्वरु छाङ तेक” ⁴⁰मुलुक छेचास ली वारकोज खियो तेक्याश, दोगोतु माजो मरियम मगदलीनी, कोनसङ याकूब रङ योसेसु आम्मा मरियम, आए सलोमी तेक्यो। ⁴¹तेबेरोइ दोह गलीलो तेक्यो, जुगो दोह निमस्कोज ब्योचगा तेक्याश, आए दोह सेवा लानजगा तेक्याश, आए हाइदे मुलूक छेचपेरङहा ली होदाह तेक्याश, हातेइ दोह रङ यरुशलेम बहबह तेक्याश।



*मन्दिरो जेरशिज
पर्दा (15:38)*



सूबेदार (15:39)

यीशु पड आगो ताहमो

⁴²तेबेरोइ शुपेलिड हाचिगयो, छुलोनमा तैयारी दयार तेक्यो, हाति सव्तु दयारु, इद दयार ओमस बच्या तेक्यो, ⁴³अरिमतिया निजया यूसुफ, हाति महासभो सदस्य तेक्यो, आए आनीस ली परमेश्वर राज इन्तजार लानो तेक्यो। दोहस हिम्मत लानलान पिलातुसु दवा ब्योक्यो आए यीशु लाश ऊनगयो। ⁴⁴पिलातुस हैरान हाचिगयो दोह होनो फटक हाल्ला शिग, दोहस सूबेदारु आरयागयो आए दोह जड ऐक्यो, यीशु पड शिशी छौंग मुलूक देर हाचिस तोहा? ⁴⁵तेबेरोइ दोहस सूबेदारु दोक्च पूरोह बयोरा ऊनगयो, दोनिम लाश यूसुफु रानमो लोइक्यो। ⁴⁶दोनिम दोहस मुखमलु इद गास्स जोक्यो, आए लाशु जड चाबचाब दोह जड गास्सो मेशलयागयो, आए इद आगो हाति डोखड कोरशिज तेक्यो, तागयो आए आगो पितिड दोड इद तेग राग तागयो। ⁴⁷मरियम मगदलीनी रड योसेसु आम्मा मरियम खियो तेक्याश, दोह लाशु हाम ताहताह रुश।

यीशु हेस्स शडग हाचिमो

16 तेबेरोइ आरामू दयार बितेक्यो, दोनिम मरियम मगदलीनी, आए याकूबु आम्मा मरियम, आए सलोमीस खुशबु सगा



दोडशीज आग (16:3)

चीजो जोगजोग दोह जड शेनमो बइक्याश। ²इतवारु दयार सोम वेन जरेरड, दोगोह आगु दड बइक्याश। ³आए दोगोह आनेतु कुमो लोशीज तेक्याश, “किशो ताइएस आगु पितिडहु दोडज राग हाइस नेस लानतो?” ⁴तेबेरोइ दोगोस, नजर शेहशेह खिगयाश, दोह मुलूक तेग राग, पितिडहु

दोडज नेस लानशीज तोह। ⁵आगु कुमो ब्योमो निम दोगोस इद जवान मिह पड छोगेह गास्सा गाजिस, जाखड बिलड तोशीस ताडगयाश, आए मुलूक हैरान हाचिगयाश। ⁶दोहस दोगोतु लोड्क्यो, “हैरान थाह हाचि” किह यीशु नासरी पड पोचो रुड, हाति क्रूसु देन चढयाया शिशी तेहक, दोह शडग हाचिस तोह, पर होज्जा माय, खिह, होज्जुइ दोह जागाह तोह, हामिडहि दोह लाशु ताहताह रुमोगा। ⁷ऐब्बे किह ब्योइ, आए दोह चेलगा रड पतरसु लोइ, दोह किनोज ओमस गलीलु ब्योतो। हाल्लाहि किनजु रिडरिड रुमोग, किह होदाइ दोह पड ताडतई।” ⁸आए दोगोह दहदह आगोज ठुरयाशो कांपेदो रड भयाडहो ब्योक्याश, आए दोगोस हातुइ छची मा लोड्क्याश, छुलोनमा भयाड-भयाड तेक्याश।

मरियम मगदलीनी पड यीशु ताड देहमो

⁹इतवारु दयार सोम हाचिमो बेरड दोह शड हाचिस ओमस मरियम मगदलीनी पड, हातुइ कुमोज दोहस स्तीश भूतोतु तोहतोह रुगयो, ताड देगयो। ¹⁰दोहस ब्योब्यो यीशु कोनयातु, हातेइ शोपड लानो तेक्याश आए क्राबो तेक्याश, दोगोतु लोड्क्यो। ¹¹दोगोस होज्जय थासथास, दोह शड तोह आए दोहस यीशु पड ताडताड तोह, विशवास मा लानगयो।

निश चेलगातु यीशु ताड देहमो

¹²जुह निम दोह हाइद रुवडो, दोगोतु माजो निशतु ताड देगयो, तेबेरोइ दोगोह गोनिडज बेरीड ब्योच तेक्याश। ¹³दोहसडस ब्योब्यो आइदेतु लोड्क्याश, पर दोगोस दोहसडहु ली विशवास मा लान गयाश।

सिहद चेलगातु यीशु ताडमो देहमो

¹⁴दोनिम दोह आनु सिहद चेलगातु दवा, तबेरोइ दोगोह खाऊ जामो तोशीस तेक्याश, ताडमो देगयो, आए दोगोतु अविश्वास रड काठस मोनडहु ताइएस डाँटयाया, छुलोनमा हातेसी दोह शडग हाचिमो निम ताडताड तेक्याश, दोगोतु देन विश्वास मा लानलान रुगयाश। ¹⁵आए दोहस दोगोतु लोइक्यो, “किह चइ संसारो ब्योब्यो मिगातु सुसमाचार प्रचार लानी। ¹⁶हाइसी विश्वास लानतो, आए बपतिस्मा ऊनतो, दोही उध्दार हाच्यो, पर हाइसी विश्वास मा लान, दोह पापी नारशो आए दोह सजा पोरेतो; ¹⁷विश्वास लानजगापो जुह निशानी नितोह, दोगोस आड नामडस, भूतोतु तोहताश, न्यूगे-न्यूगे स्कादा जहतिश, ¹⁸सापातु थोताश आए अगर दोगोस प्राणु नाश लानजया चीजु ली तुडमा, दोहली दोगोतु छची हानि मा हाच, दोगोस चोचातु देन गोद ताहताश, आए दोगोह चंगा हाचिस।”

यीशु पड स्वर्गो जु जड फ्योमो

¹⁹प्रभु यीशु दोगोह रड बातयाशीमो निम, स्वर्गू जु जड फ्योक्याश, आए परमेश्वरु जाखड बिलड तोशीगयो। ²⁰आए दोगोस ब्योब्यो चइ जागोह प्रचार लानगयाश, आए प्रभुस दोगोह रड कामड लानज तेक्यो, आए दोह निशानीगा रड हातेइ दोगोह रड हाचिजगा तेक्याश, वचनु साबित लानज तेक्यो। आमीन